

甘肅全省新通志

卷陸拾柒

76587

地180  
39

20052



甘肅新通志卷之六十七

涇州直隸州

漢李恂字叔英安定臨涇人少習韓詩教授諸生嘗數百人太守  
穎川李鴻請署功曹未及而州辟爲從事會鴻卒恂不應州命而  
送鴻喪還鄉里既葬持喪三年後拜侍御史持節使幽州宣布恩  
澤所過圖寫山川屯田聚落封奏章帝嘉之拜兗州刺史以清約  
率下常席羊皮服布被遷張掖太守有威重名時大將軍竇憲兵  
屯武威天下州郡莫不修禮遺恂奉公不阿爲憲所奏免後徵拜  
謁者使持節領西域副校尉西域數遺恂奴婢宛馬金銀香罽之  
屬一無所受道路夷清威恩並行遷武威太守後坐事免步歸鄉  
里與諸生織席自給會西羌反畔恂詣田舍爲所執獲羌素聞其  
名放遣之恂因詣洛陽謝時歲荒司空張敏司徒魯恭等各遣子

甘肅新通志

卷六十七

人物志

羣材二

一

餽糧悉無所受居新安關下拾橡實以自給年九十六卒

三國魏胡遵安定臨涇人才兼文武累居藩鎮至車騎將軍封陰  
密侯

晉胡奮字元威魏車騎將軍遵子性開朗有籌略少好武事司馬  
懿伐遼東以白衣侍從左右甚見接待驍騎路蕃討劉猛奮爲監  
軍擊破之以功遷征南將軍都督荊州加散騎常侍奮家世將門  
晚乃好學所在有聲績居邊特著威惠女爲武帝貴人甚見寵待  
加鎮東大將軍開府儀同三司時楊駿以后父驕傲奮曰卿恃女  
更益豪耶歷觀前代與天家婚未有不滅門者但早晚事耳駿銜  
之而不能害後卒於官贈車騎將軍諡曰壯

梁席闡文安定臨涇人少孤貧涉獵書史齊初爲雍州刺史梁武帝  
受禪除都官尙書出爲東陽太守在郡有能名冬至悉放獄中囚



依期而至改封湘西侯卒於官諡曰威

南北朝魏胡方回安定臨涇人父儀周黃門侍郎方回仕赫連屈丐爲中書侍郎博史籍善文辭太武破赫連昌獲之爲北鎮司馬爲鎮修表帝善之召爲中書博士賜爵臨涇子遷侍郎改定律制司徒崔浩與一時朝賢並愛重之清貧守道以壽終

韓 者字童考安定安武人永興中自赫連屈丐來歸授常山太守假安武侯居常山之九門卒贈涇州刺史諡曰成

胡國珍字世玉安定臨涇人魏靈太后父也國珍少好學雅尙清儉太和中襲父爵爲武始侯以女選入掖庭生孝明及即位靈太后臨朝加侍中封安定郡公進位中書監儀同三司同釐庶政與侍中崔光俱授帝經侍直禁中國珍上表陳刑政之宜詔皆施行靈太后以國珍年老加持節都督雍州刺史不欲令其在外就宅

甘肅新通志

卷六十七

人物志 羣材二

二

拜之靈太后孝明率百僚幸其第宴會極歡國珍年雖篤老而雅敬佛法時事齋潔自彊禮拜至於出入侍從猶能跨馬據鞍薨年八十追崇太師號太上秦公加九錫諡文宣

韓 茂字元興齊子年十七膂力過人尤善騎射魏明元征丁零茂爲中軍執幢時大風諸旌旗皆偃仆茂於馬上執幢初不傾倒帝異之擢爲武賁郎將從太武討赫連昌大破之賜爵蒲陰子又從征統萬大破之平平涼當茂所衝莫不應弦而殪進爵九門侯又征蠕蠕頻戰大捷進爵安定公太武南征茂出青州降者相繼還拜僕射文成踐祚拜尙書令加侍中征南大將軍卒贈安定王諡曰桓

鄧彥海安定人祖羌爲苻堅車騎將軍父翼爲河間相彥海性真素言行可復博覽羣書長於易筮道武定中原擢爲著作郎彥海



明解制度多識故事與尚書崔宏參定朝儀律令音樂及軍國文記詔策謹於朝事未嘗忤旨

席法友安定涇州人祖父南奔梁法友仕齊以膂力自効遷安豐新蔡二郡太守後歸魏拜豫州刺史鎮靜自安不競世利武定末除濟州刺史以廉和著稱卒諡襄侯

韓 備字延德茂子爵行唐侯歷太子庶子甯西將軍獵曹加散騎常侍襲安定公征南大將軍卒諡曰簡贈雍州刺史

韓 均字天德備弟工騎射有將略除中散爵范陽子遷金部尙書加散騎常侍備無子均襲安定公征南大將軍歷定青冀三州刺史政譽著聞廣阿澤介定冀相三州間土曠多盜乃置郡以均爲大將軍都督三州諸軍事均親身懲奸以計擒趙郡屠各西山丁零聚黨山澤行劫者威震境內先是權立東青州以招懷未附

甘肅新通志

卷六十七

人物志 羣材二

三

優復徭賦而奸人逋逃悉征焉均奏罷之括出隱戶十餘萬民始安卒諡康

胡 叟字倫許安定臨涇人少聰敏年十三辨疑釋理知名鄉國學不師受讀羣籍再閱於目皆誦於口好屬文入長安時京兆韋祖思多蔑時彥待叟不足叟拂衣而出祖思固留之叟曰論天人者其亡久矣與君相知何夸言若是遂去時年十八歸魏以其識機賜爵始復男家於密雲尋歸家不事產業飢貧不以爲恥尙書李敷遺以財不取少孤每言及父母則淚下密雲左右皆祇仰其德範

德範

齊金 祚字神敬安定涇州人性驍雄尙氣俠魏末以軍功至大中大夫討平邢杲歷涇岐二州刺史賀拔岳表授東雍州刺史令討仇池氏楊紹先於百頃岳爲侯莫陳悅所殺祚克仇池還莫知所



歸神武遣行臺侯景諭祚遂解甲而歸封安定縣公卒贈司空

彭樂安定人驍勇善騎射隨齊神武韓陵之役樂先登陷陣賊

眾大潰封樂城縣公除泗州刺史天平四年從神武西討與周文

相距樂請決戰因醉入深被刺腸出內之不盡截去復戰芒山之

役樂以數千精騎爲右甄衝西軍所向奔退遂馳入周文營俄告

捷諸軍乘勝斬首三萬餘西軍退神武使樂追之周文大窘而走

獲周文金帶一束以歸賜絹二千疋累遷司徒封陳留王

按截腸復戰恐

無此理史官特侈陳彭樂之勇耳而不知譽之適以誣之亦措詞之不檢也惟本傳已輯入始仍其舊云

周席固字子堅安定人少有遠志梁大同中爲齊興郡守士多附

之遷興州刺史大統中歸魏周文甚禮遇之拜豐州刺史累封靜

安郡公昌州刺史固居家孝友涖官頗有聲績卒於州諡曰肅子

雅少以孝聞位大將軍

## 甘肅新通志

### 卷六十七

人物志

羣材二

四

隋皇甫璠字景瑜和之子安定朝那人少忠謹有幹略永安中爲辟

州都督周文帝以璠勤事擢爲丞相府參軍周孝閔帝時封長樂

縣丞屢遷開府儀同三司璠性平和安貞守志以清白自處建德

間爲隨州刺史政存簡惠百姓安之卒贈刺史諡曰恭

牛宏字里仁安定鶉觚人祖熾郡中正父允魏侍中尙書宏性

寬好學仕周爲記室專掌文翰隋開皇初授散騎常侍祕書監上

表請開獻書路上納之一二年間經籍略備封奇章郡公奉勅撰

五禮行於世又定雅樂作樂府歌詞撰圖丘五帝凱樂帝善之後

議明堂宏條上故事上重之楊素輕侮朝臣惟見宏改容素將征

突厥詣宏言別宏送止中門素曰大將遠征敘別何相送之近宏

揖而退素曰奇章公其愚不可及也尋陞吏部尙書獻皇后崩宜

注莫定宏引舊禮須臾定典其選舉先德行而後文藝用多稱職



大業二年進位上大將軍六年從幸江都卒贈文安侯諡曰憲著書見藝文目錄

皇甫無逸誕之子安定烏支人爲隋陽太守政甚有聲大業間賜爵平輿侯入爲右侍郎守右武衛將軍

唐呂向字子回涇州人工草隸學通古今開元十年召入翰林兼集賢院校理侍太子友諸王時歲採天下姝好因奏美人賦以諷帝善之擢左拾遺帝好校獵向又獻詩規諫進左補闕從帝東巡帝令番夷酋長入仗內射禽向諫詔番夷出仗久之遷主客郎中始向之生父岌客遠方不還存亡莫知音信訪索累年不獲一日自朝還見一老人物色問之果其父也向下馬抱父足號慟帝聞咨歎官岌朝散大夫賜錦綵樂工娛其心向官至工部侍郎

牛仙客涇州鶉觚人初爲縣小史令隴西營田使傅文靜器之積

## 甘肅新通志

### 卷六十七

人物志 羣材二

五

功遷洮州司馬河西節度使蕭嵩委以軍政清勤不懈及嵩執政薦遷太僕少卿開元末爲朔方總管嗇事省用倉庫積實器械鋒銳遷工部尙書同中書門下三品爲相謹身無它與百司咨決無所處可惟曰如令式而已卒贈貞簡

牛僧孺字思黯隋奇章公宏後工屬文第進士累遷監察御史穆宗時爲御史中丞宿州刺史李直臣坐賊當死帝惜其才僧孺曰法以制有才者安祿山朱泚以才故亂天下帝從之賜金紫服以戶部侍郎同平章事韓宏卒帝遣使者收其家貲簿得朝臣受賄者皆在惟僧孺注某月日送錢千萬不納帝善之遷中書侍郎敬宗立進封奇章郡公時宦官擅權僧孺數表去位授武昌節度使多善政文宗立復爲平章事尋進宏文館大學士應詔極陳太平不可妄求語甚切直出爲淮南節度副大使三年召爲尙書右僕



射會莊恪太子薨爲陳父子君臣大倫以悟帝帝流涕以足疾乞出爲山南東道節度使賜彝尊龍勺詔曰精金古器以比君子卿宜少留固請乃行卒贈太尉諡文簡

皇甫鏞字猷卿臨涇人第進士兄鏞爲相時任河南少尹見權寵太盛每極言之鏞不悅乃求分司爲太子右庶子鏞敗朝廷賢之授國子祭酒開成初以太子少保卒著書數十篇

牛蔚字大章僧孺子第進士由監察御史爲右補闕大中初屢條時政宣宗嘉之累遷吏部郎中失權倖意貶國子博士咸通中進至戶部侍郎襲奇章侯久之爲山南西道節度使治梁三年受代黃巢陷京師遁山南故吏民喜蔚至爭迎候後以尙書左僕射致仕

宋胡順之字孝先原州臨涇人登進士試祕書省校書郎知休甯縣

## 甘肅新通志

### 卷六十七

人物志 羣材二

六

有縣民汪姓者豪橫縣不能制歲租賦常不入逮捕不肯出順之置諸法爲青州從事高麗入貢中貴人挾以爲重使州官旅拜於邸順之獨不拜大姓麻士瑤陰結貴侍匿兵械服用擬尙方州縣被陵蔑莫敢發其奸又殺其兄子其母訴於州眾相視曰孰敢往捕者順之盡得其黨有詔鞫問士瑤論死子弟流放者百餘人改知常熟縣遷太常博士明道間再上宰相書乞太后還政仁宗嘉其忠遷尙書屯田員外郎其後數論朝廷事范仲淹愛其才州里皆敬之

楊政字直夫原州臨涇人崇甯三年夏人舉國大入父忠戰沒政甫七歲哀號如成人其母奇之曰孝於親者必忠於君此兒其大吾門乎後從吳玠吳玠擊金人奮不顧身屢戰屢捷保障全蜀功效顯著政嘗爲吳玠裨將及與玠分道建帥執門下之禮益恭



世頗賢之

閻 勅涇州人高宗時爲主管步軍司金人南侵勅先守洛陽後奉太廟神主歸於臨安

明劉 偲靈臺人辟經明行修授福建道監察御史久居風憲有聲名

王 珏涇州人登永樂十九年進士爲監察御史骨鯁敢言朝野望其丰采時人呼爲鐵面御史

張 瑛字文璧鎮原人少穎悟有幹局成化八年進士授工部主事查定魏二公勅賜蘆灘額外地奏屬有司以供官廠薪費陞真定知府興修學舍積粟賑饑滹沱河泛溢沒民田廬瑛疏新河洩水又築長隄百餘里民賴以安內官李廣奪民田奉檄踏勘歸田於民陞河南參政督饟革弊歷官中外有名所至輒集事云

甘肅新通志

卷六十七

人物志 羣材二

七

史 書字獻忠靈臺人成化十一年進士授山西陽城知縣年尙少大猾路省祭輕之置諸法民皆驚服省里甲貫小罪徭賦如期百務咸集再知平山縣民習樸治以無事擢守保甯多善政視事九年以清介稱

何宗賢涇州人成化間進士官僉事弟宗禮亦官副使兄弟講學有文名

仇 鉞字廷威鎮原人正德二年以總制楊一清薦擢甯夏遊擊將軍五年安化王寘鐮及指揮何錦周昂丁廣反鉞陽附叛賊陰結壯士託病昂來視猝起捶殺之披甲躍馬大呼壯士馳詣寘鐮第縛之即傳鐮號令召錦等密諭部曲以擒寘鐮狀眾遂大潰錦廣單走賀蘭山爲邏卒所獲舉事凡十八日而散論功封咸甯伯予世券進署都督僉事充甯夏總兵官七年偕都御史彭澤討平



河南亂賊劉惠趙鏗等論功進世侯十年稱疾解營務世宗立再起掌前府事未上卒諡武襄

張 幾字知幾鎮原人正德甲戌進士司理廣平不阿權貴尋調真定吏民德之後召拜山東僉事按察青州諸部兵青州濱海多暴子弟無賴少年恣睢睥睨輕犯厲禁幾廉知其狀因坐諸豪遞擊之諸惡少匿避鄰部幾務爲追捕而鄰部誣其越俎邀功又有御史某論劾幾得左遷曰吾已稱老嫗不能復施胭脂露指尖再悅諸少年也遂解組歸里

楊仲紀子梓俱靈臺人嘉靖間仲紀官豐潤知縣多善政以理學傳家子孫克振其業梓官繁峙知縣涖官三載政簡刑清致仕歸囊無餘物時人謂有伯起之風

楊可教仲紀之後萬厯間貢生任城武訓博聞強記窮極經史與弟可立互訂理學老年不衰

郭積浩姚維兢俱靈臺人積浩任徽州學正潛心理學與楊可教可立李恆諸人講論不倦維兢天啟歲貢任彭水知縣爲政愷悌慈祥善於撫字民有清風化日之頌

董繼舒字少儒鎮原人崇禎丙子明經任蒲城縣教諭陞四川夾江縣知縣政治爲川南第一洊陞維摩州知州境內有寺周圍數頃浮屠蝟集供丈二金身遇參拜者輒泣下必捐金乃已一時傳爲神奇斂財至巨萬繼舒下車即詣寺命毀其像像中空可容數人目角有線隙爲泣之所由來座下一穴蹤之得窟室匿民婦甚夥遣之出見日笑而僵立勦其寺乃以上聞當道嘉之

姚三英靈臺人崇禎間貢生任華州訓導甘泉教諭端謹長厚兩任司鐸清標高節士人懷之歸里賑貧濟困樂善不倦以禮自處



非公不至有古風

張道字克宏鎮原人善屬文交遊皆名彥由鄉舉任登州府通判陞大同府同知遷周府長史所至有聲後解組家居日惟閉戶讀書鄉人有不識其面者著書見藝文目錄

劉璧靈臺人崇禎間歲貢任四川大竹學訓教諸生以誠正之學太守黃某委署鄰水篆將特薦璧以母年高辭告歸養德性樂易篤行力學鄉黨尤敬慕焉

苟懋勳字忠齋靈臺人崇禎間歲貢端謹恭行仿先正教授生徒多方啟牖恆言存天理積陰功以訓迪子孫

國朝雷冲霄涇州人道光乙酉舉人官固原州學正陞貴德廳教授勤於訓迪士多翕從

賈葆業字樂天涇州人道光戊子舉人性端謹不求仕進主講郡

甘肅新通志

卷六十七

人物志

羣材二

九

阮陵書院十餘年遊其門者多以能文名

梁永清字定山涇州人同治癸酉拔貢肄業蘭山書院刻苦志學竟夕不眠浮薄者每望而生畏後選授華亭縣教諭儉以自守恕以待人士類翕服弟澄清由廩貢膺教職與永清友于甚篤署通渭訓導亦有品節

任良弼涇州附生同治軍興以辦理團防出力保教職爲人溫厚和平遇事持重有功桑梓光緒初署甯州學正後選授平涼府學訓導益自刻勵以身教士卒於任士類惜之

劉景向涇州增生性恂謹生平無疾言遽色工書畫尤精金石之學回變守城宣勞保教職加光祿寺署正銜歷署華亭甯夏鞏昌府化平等處教諭

張志尹崇信人乾隆閒貢生家貧好學晝夜讀友愛堂弟志凌



多方訓迪入庠食餼既而凌娶妻求分財異居尹不能止乃中分其財且勉弟以好爲之後主鳳鳴書院講席訓課諸生以道德爲宗以文藝爲末循循善誘門下造就者七十餘人

關居靜崇信人光緒初年貢生讀書重品行有器量嘗被人陵辱縣令唐受桐知其詳使人語居靜曰速具告據以責彼以洩憾居靜唯唯令僕去語人曰彼辱我而我遂報之是我不能容物也卒不聽有姪早孤居靜視如己子教授終身循循不倦邑人稱爲純儒

殷華國字茗玉鎮原人少孤事母孝康熙間以明經授山西介休縣知縣先是介俗嫁女責聘金甚奢以故有了角白頭老死閩中者華國下令凡女子已字人者及笄不嫁罪其父母介人爭相免幣不待涓吉連日鼓吹成禮澆俗爲之盡革後乞假歸養介人爲

甘肅新通志

卷六十七

人物志 羣材二

十

立生祠

張述轅字善述鎮原人學有根據初縣志殘缺文獻無徵章起錢某宰鎮邑聘述轅撰述述轅出其舊纂粹然稱善錢某遂用劄劄按其遺編文約旨遠而記兵事一門尤詳

路于充字東山鎮原人雍正庚戌進士選榆林文學充山西同考試官于充幼時家貧好學冬掘地爲坑拾雞羽實之納足其中肅坐朗誦膏盡繼以香炷逐字映之雞鳴乃已爲人謙和與物無忤後由教職告歸閉戶讀書市人罕覩其面

張士育字雋公鎮原人乾隆丁卯舉人壬申進士官當塗知縣治舊爲輿區民室多患草竊歷任縣令均莫能制士育下車未三月即擒獲鄰境大盜蔡喜兒境內安謐頌聲載道

劉兆慶字五雲鎮原人乾隆乙酉拔貢性豁達工詩善書銓授洛



川教諭倡修朝陽書院捐立義學爲多士所尊仰同時張雲字子慶以明經貢於鄉學有淵源遠近從遊者踵至

慕佑份字秉中鎮原人乾隆丁酉拔貢癸卯舉人主講中峰書院門下成就甚多好爲古文詩著述盈篋惜散佚無存

張璐字寶臣鎮原人乾隆己酉拔貢壬子舉人博學善誘從遊者皆樂事之後赴禮闈卒於旅邸著書見藝文目錄

申繼志字述庵鎮原人官廣東巡檢所至有聲後陞高要縣知縣捐俸立義學又爲民除水患高民立碑頌之

張元鼎字和羹鎮原人嘉慶辛酉進士官山東海陽沂水長清等縣知縣俱有廉聲後年老解祖父老攀轅者數百人至歸里歲時猶遣人存問焉先是元鼎主講邑中峰書院門下多擢高第至今號爲經師

甘肅新通志

卷六十七

人物志 羣材二

十一

劉曾字省伯鎮原人嘉慶丙子舉人官安徽蒙城縣知縣涖任後百廢具舉境內有芟河自宋築有隄壩灌田數萬頃因淤泥壅塞每遇雨澇近傍居民罹害甚鉅曾率丁壯尅期赴事興役遂出舍於郊指示方略三月成功以勞卒於官祀蒙城名宦祠

賈侍舜字虞臣鎮原人嘉慶己卯進士官廣東開建縣知縣捐俸於城內及所屬南峰墟創立義學後調署興甯縣縣城濱河時有衝決害侍舜捐廉補葺之

劉之壽字梧崗鎮原人嘉慶庚辰進士選翰林院庶吉士改官貴州普安直隸廳同知有惠政同時張輝祖字紹堂候選訓導有學行著書均見藝文目錄

慕維城字紫珊鎮原人道光庚子進士官陝西石泉縣知縣先是縣有白蓮教匪據險出沒挾邪術惑民久爲巨害維城涖任後親



率壯士數人於深夜出其不意直擣巢穴殲滅之

張永福字祉堂鎮原人道光己丑進士官山西汾西縣知縣有州同龐玉柱者繼母訟以不孝永福知其冤喚其母至諭以倫常恩誼母悔自引咎伏謝遂融洩無間言永福在任興利除害厯有善政輿人愛戴之

慕 疇字霽堂鎮原人咸豐辛酉中副車次年回亂倡練鄉團護村堡後賊勢益熾全家殉難疇徑從提督雷正綰軍誓滅賊復讐總督左宗棠駐平涼檄權固原學正雷正綰任固原提督仍延入幕訪殉難諸節義數千陳當道得入奏獲旌丙子舉於鄉官西甯教諭復 大成典禮設義塾百二十區逆回陷湟中婦女殉節者歲久家貧湮而不彰疇爲訪查舉報在西甯十年陞甯靈廳教授後卒於任著書見藝文目錄

甘肅新通志

卷六十七

人物志

羣材二

三

趙君璜字瑞臣鎮原人光緒丙子舉人好學不尚浮華值兵燹後主講中峰書院勤於訓迪文人蔚起一時門下成就甚多

姚遇隆靈臺人彭水令惟兢之長子恭謹仁孝有經濟才善事繼母人無間言時遭流寇攻破縣城督修官堡殫力經營措理有方復招集鄉勇預備火器晝夜隄防邑令敖某勒有碑記總督某請加守備職銜俾駐防靈邑順治二年復遭賀寇蜂擁攻圍縣堡三晝夜遇隆鼓舞眾心合力卻敵賊始解圍遁去

張佩蘭字子芳靈臺人制行不苟弟喪姪師羅幼孤佩蘭愛如己子教之讀書不令少懈後師羅成立入庠食餼鄉人咸稱佩蘭撫姪如子云

張汝梅字子釀靈臺人嘉慶丁卯舉人厯任三水訓導中衛教諭迪化學正涼州府教授生平好延收賢士任中衛教諭時有王贊



襄者幼聰慧家赤貧汝梅收養之並教之讀成進士  
張得位字權公靈臺人事母甚孝家貧躬耕自給性嗜書手不釋  
卷與諸生談論古今得失輒中肯綮同治回亂辦理鄉團堡賴以全

甘肅新通志

卷六十七

人物志 羣材二

三



鞏昌府

漢廉 襄隴西襄武人成哀間爲右將軍在河西以恩信結羌戎羌  
戎感之

三國魏趙 昂字偉常天水冀人馬超攻冀城昂與尹奉戮力攻超  
官統軍校尉功聞遷益州刺史

張 繡祖厲人三國時麴勝襲殺祖厲長時繡爲縣吏伺殺勝邑  
人義之後仕魏官渡之役力戰有功累遷破羌將軍

晉彭 祈襄武人爲州別駕歷西郡酒泉宏農略陽四郡守累官封  
侯所至忠以衛上清以守己威以克敵恩以惠下

南北朝宋垣護之字彥宗豸道人元嘉初爲殿中將軍累遷鍾離太  
守隨王元謨入河爲前鋒進據石濟及元謨敗退魏軍悉牽元謨  
水軍大艚連以鐵鎖三重斷河絕護之歸路河水迅急護之中流

甘肅新通志

卷六十七

人物志 羣材二

西

而下以長柯斧斷鎖魏人不能禁既還戍淮陰領濟北太守義宣  
反護之率水軍大破之封益陽侯後拜青冀二州刺史卒諡壯侯  
齊焦 度字文績南安氏人孝武初魏寇青州刺史顏師伯遣度領  
軍大捷師伯啟孝武稱度氣力弓馬絕倫帝召見壯之沈攸之反  
度守郢城賊不得逞事平封東昌縣子

垣崇祖字敬遠護之從子歷北琅邪蘭陵二郡太守及齊高帝踐  
祚徙爲豫州刺史魏攻壽春崇祖乃於城西北立堰塞肥水堰北  
起小城使數千人守之魏軍攻小城崇祖決堰水魏衆溺死千數  
衆退走高帝謂羣臣曰崇祖恆自擬韓白今果其人也進爲都督  
給鼓吹一部崇祖慮魏復攻淮北啟徙下蔡戍於淮東魏果攻下  
蔡崇祖大破之領驍騎將軍

垣榮祖字華先崇祖從父兄也宋孝建中爲後軍參軍後歸齊高



帝除東海太守榮祖善彈見翔鵠雲中曰當生取之乃彈其兩翅毛脫墜地無傷養毛生後飛去預佐命功封將樂縣子拜兗州刺史

陳趙知禮字齊旦天水隴西人涉獵文史善書翰爲文贍速占授軍書下筆便就初爲陳武帝書記及武帝征侯景上表於梁元帝及與王僧辯論軍事其文並知禮所製及景平授中書侍郎陳受命每軍國大事文帝輒問之拜散騎常侍再遷右將軍卒贈侍中諡曰忠

周趙 貴字元貴天水南安人少穎悟有節概從賀拔岳平關中遷大都督岳爲侯莫陳悅所害將吏奔散貴乃詣悅詐降悅信之因請收葬岳悅許之乃收岳屍奔平涼周文帝以爲大都督封南陽郡公又封楚國公

甘肅新通志

卷六十七

人物志 羣材二

五

趙 昶字長舒天水南安人大統九年周太祖遣昶使於氏酋李鼠仁諭以禍福鼠仁感悟遂相率降復遣慰諭叛氏梁道顯皆即款附以功封章武縣伯除大都督行南秦州事擒獲氏羌撫而使之皆爲昶力錄前後功進爵長道郡公

任 果字靜鸞南安人魏廢帝時率所部來附周文嘉其遠至授南安縣公果因陳取蜀策率兵征蜀及成都平周太祖以其方隅望族早立忠節授驃騎將軍進爵安樂郡公

唐汪 達字德遠越王第三子身長七尺六寸呼如虎哮驍勇多謀貞觀八年配左衛勳府都尉十四年從征賀魯龜茲高昌有功襲爵上柱國留鎮鞏昌宋追封忠應侯歷封崇善衍佑公

李義炎隴西人貞觀中爲華陰尉縣忽失一人莫知所在其父兄以讐家所害陳情義炎案之不能決夜中執燭據案俛首不覺死



人即至帶被傷之狀云某乙打殺置某所井中義炎親往果如所  
陳當時聞見者莫不驚歎

李 白字太白隴西人十歲通詩書長隱岷山州舉有道不應益  
州刺史蘇頲一見異之謂少益以學可比相如性任俠喜縱橫好  
擊劍及客任城與孔巢父韓準裴政張叔明陶沔居徂徠山號竹  
溪六逸天寶初至長安賀知章見其文歎爲謫仙人言於元宗召  
見金鑾殿上降輦步迎論當世務草答番書辯如懸河元宗嘉之  
以寶牀方丈賜食御前親爲調羹詔供奉翰林他日泛白蓮池白  
不在宴帝歡既洽召作序時白被酒翰苑命高力士扶以登舟亦  
嘗侍帝醉使高力士脫鞵力士摘其詩以激貴妃譖之與賀知章  
李適之王璠崔宗之蘇晉張旭焦遂爲酒中八仙既而上疏請還  
舊山帝許之晚坐詿誤流夜郎放還渡牛渚至姑熟悅青山有終

甘肅新通志

卷六十七

人物志 羣材二

六

焉之志盤桓放歌竟卒成紀故宅井猶存人稱太白井隴西仁壽  
山有墓

趙 憬字退翁渭州隴西人寶應中天下薦饑憬褐衣上疏請殺  
禮從儉建中初擢水部員外貞元中李泌薦之使回紇未還尙書  
左丞缺帝以命之進中書侍郎同平章事與陸贄同輔政陸贄爲  
裴延齡所構憬救護申解得免常以國本在選賢節用薄賦斂寬  
刑罰又陳前世損益當時之變獻審官六議帝皆然之下詔褒答  
輔政五年卒諡曰貞

李 愿洮州臨潭鄉賢晟之子少謙謹元和初領夏綏銀宥節度  
使政簡而嚴境內肅然後爲左僕射節度鳳翔

李 聽字思正愿弟爲神策行營兵馬使討王承宗斬賊驍將憲  
宗壯之遷蔚州刺史召爲羽林將軍帝討李師道出刺楚州聽日



整勒士皆奮即掩賊不虞攻胸山降之以功授夏綏銀宥節度使  
統兵北討授檢校兵部尚書充河東節度使封涼國公卒贈司徒  
王 似洮州臨潭人李晟之甥武敢嫻騎射晟在師似無不從攻  
朱泚於光泰門賊方銳似與李演鏖戰蹀血賊數北諸軍乘之遂  
大振以功爲神策將擊吐蕃有功

李 賀字長吉隴西人七歲能辭章韓愈皇甫湜過其家使賀賦  
詩援筆立就名高軒過能疾書每旦出騎馬從小奚奴背古錦囊  
遇所得書投囊中及暮歸足成之母使婢探囊中見所書多即怒  
曰是兒須嘔出心肝乃已耳以父名晉肅不宥舉進士韓愈爲作  
諱辨然卒亦不就舉辭尙奇詭當時無能效者樂府數十篇雲韶  
諸工皆合之管絃爲協律郎卒年二十七

李 翱字習之隴西人授校書郎元和初爲國子博士史館修撰

甘肅新通志

卷六十七

人物志 羣材二

七

嘗條興復太平大略再遷考功員外郎禮部郎中性峭鯁議論無  
所屈嘗面斥宰相李逢吉過失逢吉詭不校翱移病有司白免官  
逢吉更表爲廬州刺史時州旱民無食權豪賤市田屋牟厚利而  
窶戶仍輸賦翱下令始以田占租無得隱收豪室稅萬二千緡貧  
弱以安入爲諫議大夫出爲湖南觀察使卒翱始從韓愈爲文章  
辭致渾厚見推當時故亦諡曰文

李中敏字藏之系出隴西元和中擢進士性剛峭辟觀察判官入  
拜侍御史太和六年大旱中敏上言宋申錫之冤不伸宜斬鄭注  
以快忠臣之魂則天且雨不省以病歸召諫議大夫遷給事中仇  
士良以開府階廕其子中敏曰謁者監安得有兒士良慚恚由是  
復棄官去開成末爲杭婺二州刺史

李讓夷字達心隴西人擢進士第累進諫議大夫開成初進起居



舍人武宗初李德裕復入三遷至尙書右丞讓夷廉介不妄交位雖顯劇以儉約自將爲世咨美

李蔚字茂休隴西人舉進士拜監察御史累擢尙書右丞拜京兆尹出爲宣武節度使從淮南代還民詣闕請留詔許一歲乾符末以吏部尙書同中書門下平章事罷爲東都留守

李琢聽之子以家閥累擢義昌平盧鎮海三節度廣明時沙陀數盜邊以琢爲宿將拜檢校尙書右僕射蔚朔等州招討都統行營節度使徙河陽三城後坐逗撓下遷刺史卒

後周趙景字長舒天水南安人成州刺史加驃騎大將軍周世宗初仇周貢等反圍廣業修城二郡郡守請景爲援賊偵知之預伏泥功嶺以待景至遂遇其伏合戰破之二郡圍解景追之至泥陽川而還

甘肅新通志

卷六十七

人物志

羣材二

六

宋王君萬秦州甯遠人熙甯五年以秦鳳指揮使從王韶開邊後擢熙河路鈐轄洮西羌叛圍河州君萬請於王韶以爲南撒宗哥城小而堅強勇所聚若併兵破之圍當自解韶用其計已而果然

王瞻甯遠人哲宗元符二年知河州初西羌籛結之奔河說瞻以取青唐之策瞻言於朝章惇許之瞻引兵趨邈川欽彪阿以城降瞻留兵屯之瞻征自以其下多叛乃脫身自青唐來降於瞻

王德字子華通遠軍熟羊砦人以武勇應募隸於熙帥姚古會金人入侵遣德謀之斬一將而還復從十六騎徑入隆德府治執僞守姚太師左右驚擾德手刃數十百人械姚獻於朝欽宗問狀姚曰臣就縛時正見一夜又耳時遂呼德爲王夜又連平濟南寇李昱池陽寇張遇斬叛將張昱俘其兵騎數萬斬苗禹禽馬柔吉送行在紹興元年平秀州水賊邵青殲滅餘黨遷同州觀察使明



年金兵破滁州德越江襲奪之追擒甚眾改環慶副總管擊兀朮鐵騎十餘萬敗之召拜清遠軍節度使諸軍都統制卒贈少傅張遷壽會州人爲元帥以戰功賜蟒袍金牌今邑中有村名金牌

張家

元哈撒兒岷之薩底族人父堪卜底節性驍勇有智略撒兒繼其武元太祖時主中軍伐乃蠻部大戰至晡諸部悉潰夜走墮崖死者不可勝計餘眾降泰和五年攻西夏復命鎮撫疊州撒兒卽后朵兒只班之祖也

高 斌安定人以明經舉授鳳陽路四川廉訪司僉事以廉能稱汪忠臣字漢輔隴右汪世顯長子事母包氏以孝聞友愛諸季終其身竭力翼之總帥府屬郡三十四路事至沒世身自爲之與從父弟副猶子三世得專殺未嘗妄笞一吏一人然至臨陣決戰上

甘肅新通志

卷六十七

人物志 羣材二

九

馬挺槍離陣先刺巧捷若神無敢當者以功賜銀符金幣及入覲賚以虎符銀章副以鞍勒弓矢賞其從者且以久勞於外以良臣代之還之鞏昌俾副總帥尋卒諡忠讓

汪德臣字舜輔世顯子年十四侍太子獵矢無虛發襲爵鞏昌等四路都總帥入覲憲宗所陳率嘉納命城河州德臣繕治室廬部署官屬數日而集進攻嘉定克之又破宋軍於隆慶詔城益昌德臣入見乞免益昌賦稅及徭役從之蜀人憚其威名諸郡莫敢出鬪甲寅夏獲宋提轄令持檄諭告守將南清以城降所俘城中民悉歸之東南戍卒數百有去志德臣知之給券縱去皆泣謝未幾帝幸益昌錫金帶俾立石紀功中統三年追封隴西公諡忠烈汪良臣世顯子年十六從兄德臣出征取四川世祖卽位阿藍台兒渾都海逆命劫六盤府庫西陲騷動詔良臣討之賊大潰獲都



海殺之西鄙輯甯捷聞賜金虎符中統三年火里叛復討平之轉鞏昌路都總帥平四川良臣禁俘掠發粟賑饑民大悅捷聞授中書左丞四川行省平章事良臣陳治蜀十五事皆納之追封梁國公諡忠惠

李忽蘭吉隴西人從征西川以功爲管軍總領取合江大獲山守臣楊大淵納款已而逃歸憲宗怒將屠其城忽蘭吉乃單騎往諭偕大淵至并言大淵不知國禮非有異謀帝悅賜葡萄酒二十年改四川南道宣慰使時蠻獠叛服不常忽蘭吉遣諭諸蠻豪長率眾來降二十三年入覲以老病乞歸里許之二十七年拜資善大夫授陝西行省尙書左丞元貞二年入覲授資政大夫陝西行省中書右丞卒諡襄敏

明汪庸舊名靈真保總帥有成子義武王五世孫也明太祖定中

甘肅新通志

卷六十七

人物志 羣材二

三

原大將軍徐達西征令馮勝取鞏昌庸堅守不下徐達怒命仆其城外先世碑圍攻益急庸遂約降於烽火臺乞保闔城軍民事聞授昭勇大將軍仍鞏昌等路便宜都總帥後改授安遠將軍指揮同知欽賜金筒誥命折奉公田二十四處異姓家人七十二戶傳世其家

王敬隴西人監生永樂間知太湖縣性毅直有膽略豪強斂跡吏民德之

韓縉字子雲隴西人舉鄉試第一永樂四年進士任吏科給事中敷陳時政不畏權奸尋轉南京戶部郎中歷事三朝才名懋著學者稱爲關西韓夫子

后能鞏昌人岷州衛指揮使永樂末伐松番羌人累遷至都指揮使鎮守岷州三十餘年號令嚴明番部懾服



張 勵字克勤安定人永樂十五年舉人仕戶曹主事員外郎中督儲祛弊有聲淮陰以建白中奄豎忌下詔獄讀書宴如也後得釋遂歸一日僕縛盜數人勵手解盜縛飯之誠令改行縱使去人以爲有陳太邱之風居官以廉稱勤儉立家子姪不許衣文繡王 宴字仲清安定人宣德閒舉人正統閒登進士授戶部主事進員外郎操行剛直勵志狷介

汪 壽世顯九世孫也永樂初嗣祖職鞏昌衛指揮同知二十年以功進指揮使宣德正統閒屢以戰功厯官至都指揮使復以靖邊功擢左軍都督府都督僉事協同副總兵守備涼州孫麟庠生嗣指揮使掌河州衛印守備環慶嘉靖初以功遷陝西都司署指揮僉事掌司印

姬序通西和人正統辛酉以監生入朝賀是夜帝夢異人奏衣紅者忠臣也次日令察之獨序通衣紅褐襖帝心異之即除爲山西汾州知州有善政

李 璪字廷玉其父鎮國將軍都督達守洮州生璪遂家焉正統七年襲洮州衛指揮使領軍三百追撫河州汪東等族奸民望風震懾又入番牧馬三千送京師以給操軍十二年收父達原受勅書齎京謝恩英宗大喜賞鈔二十五塊命璪歸洮提督屯糧後以疾致仕晉秩都指揮尋卒子隆亦衛指揮封昭勇將軍

楊仕敏字克勤隴西人永樂十四年舉人任監察御史在臺十三年考最上以爲真御史正統閒改江南太平知府振學校廣儲蓄修城池舉廢墜郡大治六年遷河南按察副使太平民懇留當道具奏加三品俸仍管府事景泰初遷山西布政使司右參政加俸一級五年引疾歸行李蕭然足蹟不至公門天順閒上遣行人李



誠召問仍以疾辭加二品俸秩布政司歲給米以優禮之年八十  
六卒

劉憲鞏昌衛監生成化間知奉化縣政平刑簡民皆悅服

范鏞字鳴遠鞏昌衛人宏治六年進士授御史鯁直敢言不避  
權貴因忤旨下獄旋得釋補浙江僉事蕭山令鄒魯讐其邑紳何  
舜賓陷之死鏞廉得其情以魯抵何死進副使備兵建昌中宦聞  
鏞風采不敢橫以開鑛厲民奏罷之歷擢操江都御史稽覈行伍  
罷橫門占役劾罷懷甯侯巡撫雲南剗奸摘弊平賦均徭滇人戴  
之劉瑾用事兵部尙書王瓊與鏞左瓊中之左遷參議卒於官  
吳養廉字廷用通渭人文學俱優任唐縣知縣有善政致仕歸設  
教西山書院二十餘年人稱西山先生

何溥隴西人監生歷官至府通判清慎平易處鄉足跡不至公

甘肅新通志

卷六十七

人物志 羣材二

三

門鄉人敬服

尹鳳字朝陽鞏昌衛人宏治間嗣祖職爲秦州衛指揮同知鳳  
剛明耿介衛人服其才後進陝西指揮使司署都指揮僉事守備  
階文以能守稱羌人畏服焉

曹廉安定人宏治六年進士授大理寺評事恤刑河南申理冤  
滯全活甚眾遷黃州知府恪慎盡職居家端嚴子孫恪守

鄒昊字宗大鞏昌人宏治十二年進士以御史謫真定推官教  
吏士習武民有劫盜悉擒之陞按察僉事蜀盜藍鄢反昊簡驍勇  
千人擊之斬首四千級乘勝直前捕斬萬人遷副使治兵川東以  
五千騎與總督彭澤擊賊大破之殺賊魁廖麻子進右僉都御史  
撫蜀遣兵勦滅餘寇擒普法惡誅之遷右副都御史廕一子錦衣  
百戶



黃宰字君佐鞏昌衛人宏治間以選掌屯廉明公慎秦人德之正德初以薦遷都指揮僉事備禦甘涼巡按御史杜某以忠孝廉武薦分守岷州威震羌漢特進古麟參將岷人泣留立祠勒石以記

彭 珏會甯人由歲貢任河南鄆陵縣丞正德六年奉檄解邊餉入京明年七月流賊攻破鄆陵殺其妻烈婦王氏珏聞痛甚已而奮然曰吾妻義不受辱死且不朽吾復何恨但城破倉庫皆爲賊有長吏苟活全身奸人乘機竊匿後患難免乃具奏辨明歸葬其妻奉旨旌表鄆陵令果被逮時人服其明決

王廷瑤字爾玉安定人正德九年進士授戶部主事監京儲商稅以廉稱監湖湘兌運以時進繼遷員外郎度支嚴明

暢 華字子實隴西人正德十二年進士知無錫縣繁劇華宰甘肅新通志 卷六十七 人物志 羣材二 三 之有餘力嘉靖初擢刑部主事讞獄畿內平反明允進員外郎遷山西按察僉事值岢嵐寇發華率兵殄其渠魁盡釋脅從分巡河東輯盜安民散白蓮之黨致仕歸

王朝用字行甫隴西人正德十六年進士授懷甯知縣時盜賊蜂起又當逆濠兵燹之餘恤民祛弊敏而惠士民懷之擢御史勅按鹽兩淮朝用請復舊額商稱便而課亦通巡按山西議平太行巨盜讞獄摘奸卓有風裁未幾以毀謫和州判

於 敖字壘州岷州人正德十六年進士授戶部郎中出知山西大同府陞霸州道山西參政擢湖廣按察使尋任右布政使陞副都御史巡撫遼東致仕爲人孝友實踐蘊藉淵深歷任中外聲施奕奕在冀南時創立外城及四方堡塞賊不敢犯民永賴之

劉 越字廷威隴西人正德中舉人授遵化縣知縣表履清苦政



多簡易而蝗不爲災又口不道人過質樸篤厚有古君子之風子應熊

王民牧安定人嘉靖戊子舉人究精經義文歸正體學者多師之任順德敘州二府判雅持冰操行李惟圖書而已自蜀歸號林下散人鄉閭稱其正直

張 濬安定人官運判自少不嬉長禠身以禮弗納於邪

王 儒安定人誠懇厚重有古君子風值宜藩變完節隱退

楊永祥安定人官尉氏丞有實惠民爲立祠

梢騰漢安定人知靈石縣擢鄭州知州決疑獄除妖習綽有政聲後陞肅邸長史每以正規王王禮重之

劉應熊字得陽嘉靖辛丑進士授嵩縣知縣中舍王臣嚴嵩客也橫里中應熊廉得其殺人事立置於法監司某亦嵩客也承嵩指

甘肅新通志

卷六十七

人物志

羣材二

十四

陷之直指許某得情立爲昭雪以卓異薦於朝授監察御史時西苑修醮命廷臣皆道服應熊獨朝服上心銜之出按河東久之以星變罷諸臺諫應熊時巡歷澤潞夕聞報朝卽治裝歸課耕蓮峰之陽不與外事一日無疾卒

楊 鑿安定人性至孝喪母哀毀踰禮以父老不欲仕父強之授當塗丞以勞瘁卒於官

王 欽字敬之安定人清修苦節事繼母至孝年已強仕母猶箠楚之敬受弗避仕爲萬泉令鋤強抑惡有聲三晉邑人紀其嘉績繪十二圖將內召以疾告歸貧無食鬻衣履以供竟饑餓死邑令伐石表其墓曰廉吏王敬之之墓

王宏謨欽之姪居官清慎不愧家學

牟 銳安定人事親孝親卒方出立宗祠行祭禮子孫至今



遵守

王民表安定人慶府教授有英氣古風就祿食以養親卻脩脯以待士

种 勛字世賞其先順天通州人父睿襲指揮同知成化末羌入寇與戰於黑山堡死之勛襲職正德初守備西固屢立戰功進參將守肅州嘉靖初以副總兵鎮涼州尋充總兵官佩征西將軍印鎮甯夏嘗自誓期靖邊塵賀蘭不復有烽燧之警

王德華字汝實通渭人貢生工楷書才華豪邁嘗與康兌山分韻賦詩兌山亦遜其捷著書見藝文目錄

閻 震其先江都人以功授鞏昌衛指揮僉事震襲職勇而善謀提兵分戍酒泉撫軍士習戰守嶙峋遇虜奮勇當先斬獲甚眾會日夕矢竭力戰死之賜祭廕衛入祀忠烈祠子璫

甘肅新通志

卷六十七

人物志

羣材二

三

閻 璫字廷獻以選掌衛事軍政修舉關西災異迭見璫上攘夷策都御史馬文升表充把總巡輯漢鳳璫宣德威訊首馘撫脅從不妄殺一人事平進階文守備練士卒謹烽埃身先士卒人樂爲用羌人畏服

閻 縉字朝宜璫子通書史善騎射以選掌衛事卓有賢聲遷都指揮僉事守備岷州邊境肅然課諸生以學文岷諸生多成就後守備蘭州追賊中寒卒於官岷人祀名宦子清亦優武長於詩有祖風

曹文輝安定人由郡博爲縣令雖三見黜清操愈厲上官有希覬者或諷之不少顧居鄉子子孤行一意人呼爲鐵曹時權奸秉國賄賂公行文輝耿介不悔性同薑桂

劉學禮安定人幼標清譽長擅文名爲金華教授母老致仕家居



四十年不入城市壽百歲終

李奎安定人性至孝任棠邑愛士惠民卓然良吏後被逮棠民叩關籲留

張東陽字清泉通渭人萬曆二年貢生博覽經史任四川南部縣主簿性剛介不阿與時宰論政不合拂袖而歸嘗訓諸孫曰學問須是知行並進方為有益彼王陽明專以致知為主只緣它是上智一流人若汝輩根器庸鈍纔曉得些道理便須實體諸躬方不負此一點靈明聞者歎服

張國綱字與立安定人萬曆二十八年舉人知順義縣以卓異擢南陽推官攝南陽縣妖寇徐鴻儒亂山左勢逼中州國綱扼關阻之寇不敢窺唐端王好長生術殘孕婦國綱發於兩臺王請罪乃已以終養歸著書見藝文目錄

甘肅新通志

卷六十七

人物志

羣材二

三

吉天相會甯人由歲貢任山東費縣知縣居官清慎歸田之日行李蕭然

楊恩字用卿隴西人萬曆二十三年進士授戶部主事博學能文有足疾閉戶著述天啟元年修郡志凡關隘民用鑿戒文獻獨有裁酌時稱信志

閻化涇隴西人泰昌間恩貢仕吳橋令時兵躡山左畿輔震動化涇多所防禦城賴以全河決運窩運道為阻化涇捐貲築隄河患遂息化其澱淤為良田數十頃居家盡孝母壽百有十二歲人以為孝感云

何士瑋隴西人萬曆間舉人授灤州知州陞四川保甯同知平水寇知貴陽府卓有風裁陞貴州按察司分巡畢烏永赤道諸苗叛命士瑋討平之四川宣撫奢寅貴州宣慰安堯臣妻奢社輝爭地



仇殺士瑋往勘入其阻反覆開諭兩酋帖然因直言魏黨中讒歸連徵不起

祁繼祖鞏昌衛人天啟間任貴州遊擊時土司安邦彥作亂謀犯省城繼祖奉巡撫王三善檄潛下龍里一鼓而破蓮花堡斬首甚眾進征南副總兵

魏藻德通渭人崇禎己卯歲貢庚辰廷試上大悅賜同進士官四川石泉知縣陞雲南北勝知州 傳闕

國朝孟家棟隴西人順治初授萊州通判甫入境即解散巨盜安插得所境內安謐嗣因軍書旁午上官委棟調劑緩急民不至困軍需不乏尋晉開封府同知值兵燹後招徠撫字會河決金龍棟寢食河干與役者同勞苦河工始成陞知河間府汰滑吏革驛弊調和民兵修輯學校去官之日士民泣送

甘肅新通志

卷六十七

人物志 羣材二

七

汪 藩字介人隴西諸生性嗜學積書甚富務實行治家嚴子弟有不率教者扑責不少貸門內終日不聞嘻嗃聲倡設邑賓興費立社課科第由此蟬聯邑修南安書院以百金助之著書見藝文目錄子彥昌諸生四川縣丞晉知縣

崔恆泰隴西縣舉人官山丹教諭骨鯁性成義不妄取主仙隄書院講席補葺文昌廟名宦鄉賢忠節孝義等祠丹士至今不忘張 渭字南谷隴西人嘉慶庚辰舉人嗜學爲汪介人所器重助貲肄業關中遂知名大挑任甘泉教諭

汪來溪字溪州藩弟道光壬午舉人幼從學於李子厚能文善書肄業關中書院與鏡塘牛鑑南園馬疏齊名後棟發四川知縣權西陽任清溪有政聲卒於官

李朝棟字西村隴西人道光乙酉拔貢性聰穎善書畫家居闕小



園仿蓮峰構假山數仞設器引泉水滿山如瀑聲同泊間避難四  
川臬司通渭牛樹梅延主講油江書院訓士有法後歸里卒著書  
見藝文目錄

張敏行字勉齋隴西人由拔貢舉於鄉道光乙巳恩科進士任  
四川隆昌令口碑載道著書見藝文目錄長子恕諸生殉鞏城難  
次子繼字少齋由拔貢舉於鄉咸進士入詞林改官四川歷任東  
鄉塾江華陽等縣

侯樹銜字翰冰隴西人道光丁未進士官四川歷任興文威遠銅  
梁等縣知縣勤恤民隱器重上游尋致仕歸行抵天水途次適鞏  
昌城陷遂沒於秦子鑑涵字鏡塘光緒乙酉拔貢用知縣官四川  
西昌縣有父風

甘肅新通志

卷六十七

人物志 羣材二

天

其門者多知名士隴上遠近學者稱爲張夫子著書見藝文目錄  
武尙仁字靜山隴西人咸豐壬子進士選庶吉士改官四川知縣  
歷任岳池廣安等州縣以循良稱尋擢知府著書見藝文目錄子  
齡優貢鞠拔貢指庠生鑣字子幘光緒己丑進士官刑部主事改  
官四川任閬中縣恪守官箴與父同

田際春字芳村隴西人咸豐壬子進士官刑部主事篤孝友族黨  
稱之

原 浹字仲思隴西人由廩生舉咸豐制科孝廉方正博學能  
文師事通渭鄉賢牛樹梅奉其教以篤行聞家素封浹節儉如寒  
素遇疫荒施棺木散寒衣設里塾恤孤矜寡後主講襄武書院成  
就甚多著作散佚惜無傳者

張守銘原名克悌字西堂隴西人咸豐乙卯舉人邃於經史大挑中衛



教諭赴省考驗適回亂道路梗阻齎志以沒兄克孝字南陔孝友性成至今論汪衙正人咸以南陔爲首云

陳邦彥字小泉隴西人由拔貢舉於鄉任永昌教諭卒於官生平篤孝友莊重自持非急務不親出門弟邦傑邦俊諸生同治甲子回亂均殉難

楊法震字東生隴西人博聞強識言必有據嘗以一字不入公門爲子弟勵長子應索李債李陰與楊某謀捏陷事敗官拘李治罪法震謂怨宜解退讓爲宜官從之人服其量少子樹德歲貢生張石麟字少陵隴西庠生孝友性成善屬文肄業關中蘭山有文名同治三四年回氛熾石麟襄辦城防兼籌兵饟保訓導五年城陷時石麟客外聞耗冒鋒鏑詣提督傅先宗營請援後權洮州廳學篆旋署甯朔教諭所至皆有德教學者宗之

甘肅新通志

卷六十七

人物志 羣材二

三

張鹿齡字壽庵隴西人性孝友好學工書同治五年回陷城其妻趙氏并女槐歲長媳徐氏均被害鹿齡與子如鏞如炳俱免於難光緒丙子如鏞舉於鄉如炳議敘縣丞鹿齡慷慨好施後諸孫皆入庠人以爲作善之報

汪定周字魯庵隴右汪世顯一十六世孫性耿介好談古今忠義事留心宗祠同治丙寅回陷城定周抱家乘外出後歸里子瑚庠生

張廷秀隴西人隨征江南髮逆以功擢都司晉副將同治初幫帶忠義營逐回酋米殿臣解省城圍權洮岷協篆統提選營威名噴噴後歸林下以壽終

左延齡字錫九隴西賈人性豪爽有膽力同治丙寅回陷城延齡妻子俱殉難克復後郡守湯某安集流亡興復市廛延齡遇事奉



行始終不怠

楊映奎字星垣隴西諸生 國初徵士楊慶十二代孫性純正廉  
隅自持同治丙寅第宅燬於回慶所著書版俱焚映奎於灰燼中  
揀石刻仍嵌壁間教授里塾門下多所成就因勞目失明年餘靜  
養復明人以爲爲善之報

楊凌霄字壤三隴西 恩貢生績學能文尤長詩同治丙寅回逆  
陷鞏郡時凌霄客外免難橐筆從戎佐平氛裨在軍中前後十年  
隴上被兵事知之最悉亂後教授里塾門下多知名士鄉試五薦  
不售遂潛心著述以隴西志乘被燬懼無徵博訪周咨書成七種  
以爲後來修志據學使葉熾昌索觀獎以襄武文獻榜其門卒年  
六十五時論惜之

張 經字緯堂隴西人光緒乙酉舉人性倜儻聰穎過人能文善  
甘肅新通志 卷六十七 人物志 羣材二 三

書二尺許字魄力雄渾踵門求書者無虛日父世勳諸生禦賊殉  
難 卹賜雲騎尉世職另有傳子繼武歲貢繼祖襲職投効軍營  
權經制

成大猷字仲經漳縣廩生博學能文長詩歌古體家本素封園亭  
花木冠絕一時有逸園十詠又名其齋曰七一山房蓋取劉青黎  
七一意絃誦其中後學推爲龍川老宿著書見藝文目錄子嗣武  
恩貢

成嘉猷字季南大猷弟道光乙未武舉好讀書從仲兄講授遂通  
班馬以下諸史子集箋注孫武兵法書法摹柳誠懸恂恂儒雅年  
三十五卒伏羌王權爲銘其墓子述武歲貢

朱龍光漳縣人庠生少慷慨有大志同治初辦邑城防復隨統領  
傅某克復渭源狄道各城游保縣丞分省江蘇歷按司獄署金山



縣事有能名卒於官

楊其馨字佩堂漳縣貢生設教邑中弟子恆數十人名下士多出其門精於易尤善支干一日館中忽生一松以時日占之得極貴兆加意培植及結實視其枚之多寡用卜門下之入庠者其數無不符驗同治中重修壽國寺用其木作 萬歲豎牌人始服其數學之精

高廷佐字官伍漳縣貢生講學以經史爲經百家九流爲緯肆力於小學訓誥教人先識字六書四聲七音考究必詳極之天文地理人物統系制作源流口畫手指使之童而習之一時學者咸遵其說著書見藝文目錄

劉樹棠字南溪漳縣貢生性澹泊詩筆清絕同學王憲官河南布政使邀之往辭不赴簞瓢屢空晏如也從布衣野老遊略無軒輊

### 甘肅新通志

### 卷六十七

人物志 羣材二

三

人稱其品在和介之間

顏 璠字少伯漳縣庠生性直不喜附會人邑舊有鹽卷規凡竈戶子姓應試概免卷費會有議革者璠力持而婉勸之乃仍舊鄉人士咸感之

李振藻安定人令淄川惠愛備至終其任未嘗輕杖一人民亦感動樂輸有權貴者侵奪族人基產且中以病僕欲致之死藻曰吾安得惜一官以致人死耶竟白其誣貧不能歸士民斂貲佐之

陳宗魁安定人康熙中以勦寇積功 特授杭州副總兵

曲春明安定人康熙中任河南南陽知縣多惠政談吏治者稱焉顏廷傑字俊臣安定人由武舉投標効力同治初署安定營把總因討逆回身受重傷腸出腹中納入縫之得更生後以戰功遞保提督銜總兵任花馬池營參將以傷發告歸卒於家



楊 昇安定人道光戊戌進士署江西廣饒九南兵備道歷有善政同治初督辦本邑城防邑北馬堡爲逆回巢穴昇攻破之著書見藝文目錄

馬綸篤字少園安定人鄉賢疏之子道光庚戌進士官陝西涇陽知縣邑有富紳父子相訟綸篤正言勸諭父子愧悔夜餽千金綸篤笑曰吾清潔自矢二十年矣卻弗受而卒全其事父子感泣銜恩其他循績多此類

馬 圻字疇甫綸篤子咸豐壬子由舉人官廣西昭平知縣蛟水暴漲浮屍蔽江圻捐俸千金獲屍二百餘葬之士民紀其德政子錫康癸酉拔貢乙酉舉人

康 敕字仲撫安定人咸豐己未舉於鄉同治壬戌成進士由禮部郎中京察一等授山東泰安府知府在任勤政愛民捐廉補修

甘肅新通志

卷六十七

人物志 羣材二

三

文廟書院並捐助課士膏火光緒二十三年因外人爭持事多掣肘告歸巡撫李秉衡深許之

王作樞字宸垣安定人同治庚午舉於鄉官秦安訓導以禮法自持勤於訓課成就多知名士甲戌成進士選庶吉士留館編修光緒壬午分校北闈衡鑑精審應聘主講省城求古書院研經究史文風丕振丙戌分校禮闈得士稱盛膺館選者八人後皆顯達以積勞卒同官惜之著書見藝文目錄子黼堂拔貢生

馬佩珂字玉因安定南鄉人由拔貢舉同治癸酉鄉試回亂時遊幕關中得免於難品端學正爲鄉里所矜式山左夏與賢任乾州輯刊周易讀本佩珂實與校讐之役後任學博課士勤劬卒於任所

吉 朝字覲侯安定諸生學品兼優同治初回亂朝督團擊賊以



功保訓導後肄業蘭山齋志以歿士論惜之

安守和字煦齋安定人同治癸酉舉人甲戌成進士官陝西延長興平等縣調署臨潼雨雹成災守和捐廉賑救民得不困巡撫葉伯英以悃悞無華實政愛民奏獎調補長安擢邠州直隸州卒於任

安蔭甲字乙垣安定人光緒壬辰進士官廣東羅浮知縣政簡刑清有鐵面案下無私情之謠去之日羅浮士人著榮歸詩草送之李文敏會甯人順治五年拔貢任鹽運司經歷升宣城縣知縣太倉州知州居官嚴正清廉宣城人士感其德政著仁政錄以頌

吳友聞會甯人順治間歲貢任平涼訓導升乾州學正西安府教授歷甯國府歙縣縣丞直隸故城縣知縣善草書鄉人至今珍藏焦元奇會甯人應募從戎奮威將軍王進寶進勦吳逆時累建奇

甘肅新通志

卷六十七

人物志 羣材二

三

功後朱浪叛元奇從征日將晡奉令略地遇大敵元奇單騎陷陣出入數回斬首百餘級敵驚散遠遁元奇還滿天星斗血染征袍大將軍召至帳前日壯哉此真將才也以功授插箭嶺守備

張秉樸會甯人中營副將從王進寶勦吳逆凡遇堅壘樸輒捷入攻城都樸以五爪鐵索搭堞上城守兵以巨石擊破頭盔血淋漓樸以短刀撐盔一躍登城喊聲如雷師繼之遂克里人重其義勇立祠

張思誠會甯武生雍正初年從征新疆勇健營以功授山西平陽府守備

王端會甯鄉賢萬祥孫由監生考授同知任長安知縣勤敏精幹有惠政刻祖萬祥西征紀略行世

范芝字紫山會甯人由廩貢任咸甯訓導遷鄜州學正先是會



甯差徭車馬咸出比閭芝以民病白大吏革除之及官咸甯鄜州  
整飭學宮培養生徒士林愛戴

柳邁祖字直齋會甯人乾隆丁酉拔貢官平番訓導中庚子鄉試  
第一遷長安教諭丁未成進士選庶吉士改授戶部主事升員外  
遷刑部郎中選保慶府知府慈祥廉介嘉慶初教匪竄入秦州會  
城惶恐時邁祖丁憂家居捐募健卒守禦賊不敢逼居官專務以  
德化民聽訟每平心開導人皆輸情帖服沒後歸里惟載圖書而  
已

蒲 茂字蔚林會甯庠生教讀多年從游者眾學規整嚴同治七  
年歲大饑糧路爲逆回梗塞邑人冒險赴鄰縣糴糧者多被賊傷  
糧價昂增三十餘倍茂四子或死於病或死於飢饉茂杜門忍飢  
有饋食者卻不受竟餓死其族孫庠生葛山亦忍飢餓斃

## 甘肅新通志

### 卷六十七

人物志 羣材二

三

張登岱字嶽生會甯人同治初回亂登岱入伍練習歸而訓其鄉  
人五年春賊數百騎來伺間攻城登岱請命邑令某偕壯士九十  
餘人夜擣賊巢同人中途怯退登岱奮短刀直入連斫數十賊賊  
眾驚起登岱突圍出且戰且走賊疑有伏遂奔散登岱得生還是  
年除夕賊襲陷邑城連陷各堡寨登岱居城北張堡賊眾來攻登  
岱射殺數人屢攻屢有射殺堡賴以全給把總

楊國華字選卿會甯人幼聰穎有膽力同治中回亂國華投効營  
伍每戰必先總督左宗棠給六品軍功後攻靈州屬之峽口賊壘  
金積堡賊巢身受重傷晉藍翎千總十一年隨征肅州賊匪有功  
保陞花翎守備歷署慶陽營合水縣經制外委靖遠協營右哨把  
總光緒二十一年隨提督董福祥剿河湟叛回保補用都司旋卒  
溫湧龍會甯庠生讀書敦品安貧樂道不妄交不苟取不入公門



日行街衢目不斜視見者皆敬之古人之名婦孺咸知年六十餘  
邑富紳某慕其人聘教子入學致敬後月餘某未一謁湧龍供饌  
仍豐力辭去其不苟如此

陳元佐會甯人同治十一年以武童投甘軍董字中營隨剿河州  
西甯等處逆回克復城池又隨大軍戰新疆克復烏魯木齊瑪納  
斯各城並攻克達坂城托克遜賊巢又復吐魯番滿漢兩城後河  
州回復叛調解城圍以功厯保花翎提督博清額巴圖魯光緒三  
十四年入督標中營供差以舊傷發卒

牛星煥通渭人氣宇英特父騰漢爲仇家逼星煥入庠後坦解讐  
仇子魴康熙乙酉舉人嘗過關山因暑披衣作大鵬展翅詩有肩  
頭日月雙珠掛眼底乾坤一葉飄之句其同年馮某曰下句何視  
世太冷耶次年果卒

甘肅新通志

卷六十七

人物志 羣材二

三

王希旦字佐宋通渭廩生不求仕進工書法善啟迪後進生徒擢  
巍科策仕籍若張翼儒李南暉張景元其最著也甲辰之變希旦  
族黨中多捐軀赴義其風化有素矣

張翼儒字渠若通渭人乾隆壬申鄉舉第一廉隅持躬少從李南  
暉遊及南暉任威遠縣翼儒代纂威遠志主講青峰書院諸生欽  
服晚任富平縣司訓縣令貪污劾罷其職翼儒亦拂然歸將行土  
庶具贐卻不受祖錢數十里流涕而別

張景元字殿魁通渭人貢生嘗與友人聯詩李南暉服其敏捷張  
翼儒賞其豪華任皋蘭訓導時司道稱其才學未竟素裕卒

南炎曾字念詒通渭人乾隆戊子舉人大挑用知縣官廣東新甯  
知縣貴州永甯知州陞廣西南甯府所至頌聲載道著書見藝文  
目錄



令敷南字敬五通渭人道光乙酉拔貢性質直詩情俊逸士林爭傳誦之肄業南山書院徐樂園李觀海皆器重之凡五躡秋闈以親老不復事舉業親歿廬墓三月哀毀成疾卒著書見藝文目錄景運亨字會嘉通渭人道光壬辰舉人授狄道州學正蒞任題聯明倫堂云實至名斯副必如范希文作秀才方可自稱學者師嚴道乃尊不若胡安定爲教授何能無愧先生著書見藝文目錄牛樹楠字石亭庠生鄉賢樹梅弟樹梅官蜀樹楠在家致書必拜而後發回治初回變起眾推爲堡總每賊至跪禱神前賊不退不起也初村人好賭樹梅請縣官示禁後漸弛樹楠剴切勸戒人爲感動訓導盧某與樹楠以書往來講身心之學年八十尤有志上進著書見藝文目錄

甘肅新通志

卷六十七

人物志

羣材一

美

伍重華字協一通渭人咸豐辛酉舉人回變鞏城陷傳某軍馳至土皆枵腹荷戈重華急索糧以供傳大喜保以花翎通判銜約其徒李茂南爲之副鞏郡復保升知州加運同銜時大饑設方賑濟並立會友齋課以勵人才及主講邑書院善獎士類爲士子捐助膏火貢費後官中衛教諭卒

牛瑜字子忠鄉賢樹桃子性至孝母沒水漿不入口者七日同治癸酉優貢朝考用知縣壬午舉於鄉分發四川試用時總督丁葆楨每試以艱鉅事立辦遂委署永甯調署南溪代辦宜賓補巫山到任必先清理積案有疑獄前任不能結者必精思研慮務得其情不使小民久繫囹圄一時頌聲大起以積勞卒於官年四十有二

党呈祥字潛庵通渭人光緒乙亥舉人兄逢祥有學行呈祥事之如溫公之於伯康然弟某業農時有軍役任重道遠以身代之主



講邑書院肄業者眾皆悉意引導暇則閉戶著述郡守周某聞其賢延爲教讀師卒於館舍著書見藝文目錄

王 偉字俊卿通渭人咸豐辛酉副貢光緒乙亥舉人同治初回變鳩眾築堡人恃爲障乙丑歲饑偉代爲借助得粟五百餘石全活甚眾戊辰侯匪某遣使誘降不應遂大怒悉眾攻之越三日堡陷偉令婦女集一室手刃於門賊義而釋之後主講邑書院旋任固原州學正善誘士類卒於官

張鳳瑄字仲簫通渭人光緒乙亥舉人同治時辦理軍務時有詐領軍費者傅先宗怒甚執所部數十將斬之鳳瑄解曰詐領者遊勇非所部也傅悅遂釋之賊平任莊浪訓導初鳳瑄失明所讀書悉以意會腹稿成倩人代寫後醫治復明歷任循化訓導著書見藝文目錄

甘肅新通志

卷六十七

人物志

羣材二

三

景漢文字雲川通渭貢生工書法善詩嘗作惜字會精岐黃術診疾先貧後富子孫領鄉薦舉孝廉者累世不絕季孫運泰官江西知縣孝行著於閭里

劉廷瑚字夏彝通渭貢生設教嚴學規弟子百餘人皆循循有規矩望者不問而知爲劉先生弟子尤善啟發東脩皆取其半從遊者成材極眾又喜施濟子孫衣冠濟濟人以爲善教之報云

田鼎銘字子鈞通渭馬營監人少負異才讀書不爲章句之學同治初回亂辦團防有功桑梓嗣投効捷奇及恪靖等軍進次安西州寄籍入庠以歷年勞績保藍翎縣丞尋出關辦理董字營營務升花翎同知銜知縣補阜康攝疏附縣事卓著循聲光緒十八年三月奉委前往坎巨提部與英員會立酋長並勘界八月差竣以直隸州知州在任候補旋攝英吉沙爾廳事軍民愛戴光緒甲午



海氛不靖 廷旨派提督董福祥統甘軍入衛鼎銘嚴冬星夜赴甘催募刻日成軍率以赴京次年六月董奉 命援甘鼎銘仍總理營務兩赴通州製辦軍械既出都以積勞感暑卒於保定軍次事 聞贈知府銜子廕子治字少筠同知銜分省補用知縣魏雄才甯遠人順治時庠生入監肄業議敘知縣任四川江油縣政簡刑清民以不擾致仕歸裝止存祭器而已

楊廷棟字隆吉甯遠楊家坪人性穎悟目覽數行過輒成誦由舉人大挑官浙江景甯知縣後改就教職任河州學正造就實多晚年設帳里中士林欽爲模範皆稱楊夫子兵燹著述無傳

陳獻文字季足甯遠大柳樹人歲貢篤學不倦教授有法一時士風丕變著書見藝文目錄子至化歲貢

李 泰字遠亭甯遠貢生立身行己言動循理官蘭州府訓導俸

### 甘肅新通志

### 卷六十七

人物志 羣材二

三

滿乞退寅寮留之不聽家居三年臨終戒子孫曰勿以惡小而爲之勿以善小而不爲日計不足月計有餘爾其勛諸語畢而卒時年七十九子允修字子中以副貢主講正興書院成就者多

王鴻緒字纘臣甯遠人聰穎絕倫六七歲能屬文讀書日數行下光緒戊子舉於鄉主講渭川襄武兩書院懇懇訓迪成就甚多學者咸宗仰之著書見藝文目錄

李 騏字建堂甯遠人安貧樂道不慕榮利見善則稱子弟有好讀書者諄諄教誨成就甚多性脫灑縱有觸犯不置懷少長咸親就焉年八十謂親友曰吾將於四月八日去矣及期果卒子守謙舉人

宋之琦字台鼎伏羌庠生 國初流氛未靖賊數攻城縣尹自粹然議守之琦助之城卒全柴園有困臥道病斷費者之琦扶至家



調養愈資遣之夜嘗讀書別業中有偷者入室之琦遣以微物且激其良心偷者不忍持物去厥後四川提督孟惠遣使來聘比至署延之後室曰昔困卧柴圍賴君活我今陡貴當與君共時川中寇氛熾之琦復出計助戰賊平孟惠與巡撫李某交薦以州縣用任緜州巴蜀自張獻忠流賊殘傷後流亡殆盡之琦抵任招集流亡安置佃戶越八月勞勩成疾告歸卒

王羌特字冠卿伏羌人幼穎悟髫齡時通孝經四書春秋大義順治四年拔貢考職通判康熙九年授雲南順甯府倅郡處荒徼兵燹後殘民孑遺半皆蒲蠻羌特振文風招流亡民心愛戴癸丑十二月赴京適滇藩吳三桂叛奉 旨在京食俸復 命隨總帥鄂善荊州軍前効用艱苦萬狀卒於軍著書見藝文目錄

張輔辰字漢亭伏羌人性醇謹家貧嗜學登康熙庚戌進士官江甘肅新通志

卷六十七

人物志 羣材二

三

西信豐知縣招流亡勸農興學有循聲歸田十二年裁成後進不倦著書見藝文目錄

武 籌字運帷伏羌人初不羈後忽折節讀書康熙乙未成進士官廣東番禺縣二年卒於官著書見藝文目錄

王秉乾伏羌庠生乾隆甲辰回變秉乾勵眾守城晝夜無倦容士民感激以干城元勳匾贈之

魏輔君佐君伏羌人兄弟俱列武庠乾隆甲辰回寇熾內患尤多二人奉命捕逆首並守城有功邑人至今傳其勞績

潘欽岳字友海伏羌人性高明胸襟瀟灑以能文善書知名隴右嗜古績學學使王某造廬尊禮之著書見藝文目錄

楊世茂字文齋伏羌人清操甘貧恭以持已謙以接人鄉試盛薦不售然學優養邃士林盛稱之



鞏辰極字道三伏羌人穎悟能屬文學使器之初應鄉試不售遂無意進取教授生徒講明正學溫恭雅飭迄老無惰容

張奎五字文泉伏羌人學深養邃儒林矜式邑令史某顏額曰皋比永存並爲立傳子泗紹

黃庭字號墨塘伏羌庠生善醫同治丁卯夏暴雨如注沙隄冲決淹沒田家無算直浸城垣庭字奉縣令左某諭督修不辭勞瘁兩閱月工竣邑人利之辦城防尤盡心力時宿公所八年秋縣令侯某重開廣濟渠諭庭字督工侵冒風雨嬰疾不起令以急公好義獎之

麻盛字德茂伏羌人生而穎異學以躬行實踐爲歸父早亡事母至孝學使者武奇其文以大成目之乃棄舉業講學於家遠近來學者甚眾皆稱爲麻夫子

甘肅新通志

卷六十七

人物志

羣材二

罕

張泗紹字述之奎五第三子性孝友學問素優常教人先品行後文藝學者奉爲模範

蔣煥林字夏卿伏羌增生嗜經籍工詩畫敏行訥言不趨時好蔣昶齡字延年伏羌人入郡庠安貧好學老而益篤次子繡鳳拔貢

蒲瑞字輯五伏羌人家貧嗜學善書法履潔懷清不趨時尚介節足稱

劉祖昆西和岐山里人業儒尤精於醫年登上壽邑令匾其門曰積善餘慶乾隆十九年公舉鄉賓邑令贈匾曰德與年進

劉殿佐字願三西和歲貢工詩哀然成集邑令陳某爲之序見藝文

陳三綱字紀明西和文三所人讀書通大義天性肫樸事親孝教



子嚴閭里敬信之晚年謝絕浮務不入城市者二十年卒年八十有三

盧玠西和人 恩貢舉鄉賓訓蒙終身門下多所成就鄉里推爲名宿

王元德字升聞西和 恩貢幼穎悟讀書過目成誦爲文雄奇下筆千言立就詳究濂洛關閩之學左右簡編仰思俯讀有得輒筆載誨人不倦以故遊其門者甚眾與兄弟子姪輩互以睦嫻寬厚相敦勸學者仰之

方揚祖西和人咸豐戊午舉人同治二年十月髮逆圍城揚祖總團防事與貢生周丕烈民人何嗣林阮兆祥和衷共濟籌畫精詳隨縣令王廷梓晝夜防守不辭勞怨賊退鞏秦階道林之望上其事獎署階州學正丕烈亦權清水訓導嗣林兆祥各獎六品軍功

甘肅新通志

卷六十七

人物志 羣材二

空

劉中禮柳興胡嘉文皆西和人有膽勇同治二年十月髮逆圍城急三人督團勇晝夜防守城賴以全賊退敘勤勞當道各獎以六品軍功

郭成峻字于天岷州人雍正壬子舉人乾隆乙丑進士官直隸容城縣任滿歸家杜門不出弟成魏丁丑進士官四川榮昌縣未久亦致仕歸昆弟怡怡敦詩說禮岷人咸稱之謂若宋氏郊祁蘇氏軾輒云

楊本植字培之岷州人乾隆甲子副貢精渾天學善觀乾象推歲差定節氣閏月不少謬

秦建中字際五岷州人庠生嗜學好古嘗念岷處邊徼文物遜中原兼順康兵燹風雅道微思有以振之闢雪圃與陳近思王文繡諸人會文談藝詩教以興著書見藝文目錄



全 珩字南珍岷州南川人幼穎異工吟詠乾隆癸酉拔貢教習  
景山覺羅官學生俸滿授三水縣教諭保陞浙江鎮海縣知縣調  
福建長樂縣旋以事鑄職歸著書見藝文目錄

李瓦匠

佚其名

岷州西鄉壘麻里人少業陶老無子與妻賣酒東關  
嘉慶三年春川匪入岷境城外居民皆徙入城瓦匠謂其妻曰勿  
徙賊來憐我老或不殺即殺之亦了此生耳無何有賊縛虜民十  
餘人來入室瓦匠夫婦奉迎賊問有酒不曰有即爲溫酒燻肉賊  
大嚼飲旋醉而臥瓦匠故勸飲呼不應遂以所用瓦刀急擊賊背  
呼門外虜民入共縛之時城門堅閉呼守陴者以繩縋賊上瓦匠  
夫婦並虜民亦縋而登官訊縛賊乃其酋張紅磚也殺之懸其首  
於城上及賊大股至薄城索紅磚甚急都司關某以箭射之中一  
賊足乃去

甘肅新通志

卷六十七

人物志

羣材二

望

王繼政字善庭岷州人光緒壬午舉人讀書稽古足不履城市岷  
志自雍正以來迄未修續繼政採輯舊事都爲一冊足資攷核  
杜生蓮岷州人歲貢官孝義教諭並攝洵陽縣篆年七十致仕歸  
治家有法婦女不衣裙不敢至前子景奎歲貢官整庠訓導  
魏自友字連山把總舊洮人年八十二鶴髮童顏子四孫二十曾  
元孫八同知賈某贈題五世一堂匾額且曰古語云多太公之二  
年少伏生之八歲其君之謂乎時康熙丙戌冬也舊洮原無西門  
自友以農民不便獨力開之至今人咸稱道云

姜徵渭字漁璜洮州歲貢少嗜學精究六經晚銓靖邊訓導辭不  
赴性仁讓口不道人過有言人過者則掩耳而走戒子弟勿效之  
每聽官至必謁徵渭四方學者咸敬禮焉

姜蟾桂洮州歲貢性端正動止有方愛人以德出其門者皆爲鴻



儒輝山陳鍾秀等其最著者也

汪毓秀字翹林洮州歲貢性孝友樸重端方有服儉以潔嚙得菜根意家居授徒教誨不倦洮岷士出其門者七十餘人晚年任隆德訓導體恤寒士教育有方平涼道張某重其品欲薦諸當道力辭之三年解組歸省身克己老而彌篤

陡韞章字達夫洮州人聞汪翹林善講學重實行遂從之遊領悟甚捷翹林甚重之晚入成均授徒多所成就嘗謂誠意章戒欺求慊即孟子養氣章注腳學者須從此下手其鞭辟近裏確有實得如此

敏明福洮州人少好讀書長從軍有功歷保藍翎千總居鄉有骨鯁輒面折人過善教子孫克紹七世書香年八十四終

李崇文字光斗洮州諸生性嗜學於書無所不讀家居授徒與門人解惑析疑口應如響貢生殷令丑等皆出門下每邑宰過必式其廬呼爲先生而不名壽九十卒門人私謚爲文敏先生

范玉麟字瑞庭舊洮歲貢生父榮性狷介言笑不苟庭訓甚嚴玉麟少有順德長通書籍素履無玷尤工書法精醫術濟人甚多漢回皆愛敬之

甘肅新通志

卷六十七

人物志

羣材二

聖



秦李 信成紀人年少壯勇爲秦將嘗以兵數千逐燕太子丹卒破得之始皇以爲賢勇遂使信與蒙恬將二十萬伐荆大破荆軍又與王翦子賁破定燕齊地秦遂盡并天下

漢李 廣隴西成紀人秦將李信後也世世受射孝文十四年以良家子從軍擊胡用善射殺首虜多爲郎騎常侍數從射獵格殺猛獸景帝即位爲騎郎將吳楚反時爲驍騎都尉從亞夫戰昌邑下顯名爲上谷太守數與匈奴戰戰無不勝徙爲上郡太守屢以計誘殺匈奴又徙隴西北地雁門雲中太守屢出擊胡行無部曲行陣就善水草頓舍人人自便不擊刁斗自衛亦未嘗遇害武帝即位召入爲未央衛尉已爲右北平太守匈奴聞之驚曰漢之飛將軍避之數歲不敢入右北平廣廉得賞賜輒分麾下飲食與士卒

甘肅新通志

卷六十七

人物志 羣材二

四

共之爲二千石四十餘年家無餘財元狩四年從大將軍青出塞廣軍失道大將軍責廣之幕府對簿廣曰年六十餘終不能復對刀筆之吏遂自剄百姓無老壯皆爲垂涕

李 蔡廣從弟少與廣俱事孝文帝景帝時積勞至二千石武帝時從大將軍青擊右賢王以功封樂安侯元狩初代公孫宏爲丞相蔡名聲出廣下甚遠然廣不得爵邑而蔡爲列侯位至三公

李 敢廣少子廣三子當戶椒敢爲郎天子與韓嫣戲嫣少不遜當戶擊嫣嫣走天子以爲勇當戶早死椒爲代郡太守皆先廣死廣死時敢以校尉從驃騎將軍擊胡左賢王力戰奪左賢王鼓旗斬首多賜爵關內侯代廣爲郎中令當戶有子陵

李 陵字少卿爲侍中建章監善騎射愛人謙讓下士武帝以爲李氏世將使將八百騎深入匈奴視地形還拜爲騎都尉將勇敢



五千人教射酒泉張掖天漢二年貳師將軍出酒泉擊右賢王欲使陵將輜重陵受召命將步卒五千人出居延北行三十日至浚稽山單于以兵八萬圍陵軍陵搏戰千弩俱發殺傷匈奴積數萬人匈奴知陵軍無後救遮道急攻漢軍一日五十萬矢皆盡韓延年戰死陵曰無面目報陛下遂降邊塞以聞帝怒甚問太史令司馬遷遷盛言陵事親孝與士信常奮不顧身以徇國家之急有國士風其不死者誠欲得當以報漢也上聽讒盡誅陵母弟妻子並下遷腐刑久之上海陵無救迺遣使勞賜陵餘軍得脫者陵在塞外二十餘年卒

王莽字穉叔天水人昭帝初爲右將軍燕王旦謀逆與姊蓋長公主通謀主報旦言所患獨大將軍霍光與右將軍王莽會莽卒旦逆謀遂決

甘肅新通志

卷六十七

人物志

羣材二

望

趙弟上邽人以騎士從貳師將軍伐大宛以手斬郁成王功軍還封新時侯

趙充國字翁孫隴西上邽人初以六郡良家子善騎射補羽林爲人沈勇有大略少好將帥之節而學兵法通知四夷事武帝時從貳師將軍擊匈奴有功拜爲中郎昭帝時遷中郎將爲水衡都尉擢後將軍定冊尊立宣帝封營平侯光祿大夫神爵元年諸降羌及歸義羌侯楊玉等劫略小種背畔犯塞漢將出兵討之時充國年七十餘上老之使御史大夫丙吉問誰可將者充國對曰亡踰於老臣者矣兵難遙度願馳至金城圖上方略充國至金城夜遣三校銜枚先渡渡輒營陣虜來令軍勿擊嘗以遠斥堠持重愛士卒先計後戰遂西至都尉府日饗軍士士皆欲爲用嘗上書陳兵利害謂先誅先零則罕拜不煩兵而服上從之果如其言於是上



屯田奏願罷騎兵留田條屯田十二便帝從其計充國振旅而還  
賜安車駟馬黃金罷就第朝廷每有大議常與參兵謀問籌策焉  
年八十六薨諡曰壯侯

趙 卬充國子也先以右曹中郎將將期門伏飛羽柱孤兒胡越  
騎爲備羌支兵至令居有詔將八校尉迹捕山間虜通轉道津渡  
復詔卬將伏飛射士步兵二校益充國兵出斬降二千餘人凱旋  
三國魏薛 夏字宣聲天水人博學有才魏武宿聞其名甚禮遇之  
後文帝雅重其才黃初中爲祕書丞帝與夏推論書傳未嘗不終  
日每呼薛君而不名夏甚貧嘗願其衣薄解御袍賜之魚豢撰魏  
略以夏及董遇賈洪邯鄲涪隗禧蘇林樂祥等七人爲儒宗謂當  
天下分崩學業沈隕處荒亂之中而能守志彌敦也

晉陳 安隴城人永嘉中爲都尉太興二年南陽王模世子保稱晉  
甘肅新通志

卷六十七

人物志 羣材二

吳

王上邽大饑其將張春奉保之祁山安據秦州應保兼稱藩於劉  
曜三年保遷桑城爲春所殺安討春殺之葬保以天子之禮永昌  
元年還保上邽隴上氏羌皆附安安士馬雄盛有衆十萬自稱大  
都督涼王明帝大甯元年夏安圍趙征西將軍劉貢於南安貢與  
曜秦州刺史石武合擊破安安走保隴城遣將宋亭守上邽秋七  
月曜自將圍隴城安出戰輒敗終爲曜將呼延清所害安善撫接  
士卒吉凶與衆共之及其死隴上爲歌詞悼惜之

苻 雄字元才天水略陽臨渭氏洪季子堅之父也少善兵書多  
謀略好施下士有政術兄健僭位爲佐命元勳權侔人主而謙恭  
奉法健嘗曰元才吾姬旦也及卒健哭之嘔血曰天不欲吾定四  
海耶何奪吾元才之速也

苻 融字博休堅季弟也少魁偉美姿度健世封安樂王融上疏



固辭健深奇之及長令譽彌高爲朝野所屬堅立拜侍中封陽平公聰辯明慧下筆成章嘗著浮圖賦世咸珍之銓綜內外刑政修理進財理滯尤善斷獄發奸摘伏爲堅所委任遷司隸校尉時慕容垂姚萇說堅平晉融每諫曰江東天之所相終不可滅垂萇吾之仇敵冀因變以逞其凶堅不聽遂及於敗

苻朗字元達堅從兄子也性宏達神氣爽邁幼懷遠操不屑時榮堅目之曰吾家千里駒也及拜鎮東將軍青州刺史身爲方伯有若素士耽翫經籍手不釋卷在任甚有稱績堅敗入晉加員外散騎侍郎既至揚州風流邁於一時謝安設讌請之朝士盈坐皆自以爲不及著苻子數十篇行於世

權翼天水略陽人其先殷武丁之子封於權周衰入楚爲權氏秦徙大姓於隴西權氏遂世居略陽翼仕苻秦爲給事黃門侍郎

### 甘肅新通志

### 卷六十七

人物志 羣材二

三

與北海王猛太原薛讚並有佐命勳翼封安邱公官至左僕射堅將伐晉翼進諫曰晉祚雖微未聞喪德謝安桓沖皆江表偉人君臣輯睦未可圖也堅不聽終敗

姜平子天水人苻秦時爲秦州別駕堅饗羣臣於前殿樂奏賦詩平子詩有丁字直而不曲堅問其故對曰臣丁至剛不可以曲且曲下者不正之物未足獻也堅笑曰名不虛行因擢爲上第

呂婆樓略陽氏人也其先呂文和漢文帝初自沛徙略陽世爲酋豪梁平老亦略陽氏也苻堅要結英豪以婆樓平老並有王佐之才引爲羽翼苻生僭位殘虐無度苻堅將廢之謀之婆樓對曰某不足以辦大事里舍有王猛者謀略不世出堅因婆樓招猛一見如舊交堅大悅既廢生以婆樓爲司隸校尉平老爲右僕射王猛薛讚皆爲中書侍郎與權翼並掌機密除生苛政秦大治婆樓後



官至太尉子光事詳割據

尹 緯字景亮天水人少有大志每覽書傳至宰相立勳之際常輟書而歎苻堅以尹赤之降姚襄諸尹皆禁錮不仕緯晚乃爲吏部令史及姚萇奔馬牧緯與尹詳龐演等扇動羣豪推萇爲盟主遂爲佐命元功萇既敗苻堅遣緯說堅求禪代之事堅問緯曰卿於朕何官緯曰尙書令史堅歎曰宰相才也王景略之傳而朕不知卿亡也不亦宜乎萇死緯與姚興滅苻登成興之業皆緯力也歷輔國將軍尙書左右僕射封清河侯卒贈司徒諡曰忠誠姚氏初興時招攬賢傑所用尤多隴上之英襄以天水尹赤爲司馬略陽伏子成爲左部帥強白爲右部帥王黑那爲前部帥萇以天水尹詳爲左長史狄伯支焦慮梁希龐魏任謙爲從事中郎姜訓閻遵爲掾屬王據焦世蔣秀尹延年牛雙張乾爲參軍王欽盧姚方

甘肅新通志

卷六十七

人物志

羣材二

吳

成王破虜楊難尹嵩裴騎趙曜狄廣党刪爲帥方成至征南將軍爲興決計誅王統苻允曜至鎮遠將軍嘗西屯金城迎呂隆於河西又以荊州刺史攻取南鄉伯支以尙書與緯同受遺命輔政尤有功力也

姜 龕天水人經明行修門徒數百姚興時與東平涪于岐馮翊郭高皆耆儒碩德教授長安諸生自遠而至者萬數千人興聽政之暇每引龕等於東堂講論道藝錯綜名理於是學者咸勸儒風盛焉

梁尹 正其先天水人後梁宣帝蕭詵初涖雍州正爲其府中兵參軍擒張纘護杜岸皆正之力詵承制以爲大將軍及稱帝除護軍進位柱國封新野縣侯卒諡曰剛

北魏趙 逸字思羣天水人好學夙成仕姚興歷中書侍郎後入魏



事世祖拜甯朔將軍赤城鎮將綏和荒服十有餘年百姓安之性好墳典白首彌勤年踰七十手不釋卷凡所著述詩賦銘頌五十餘篇逸兄溫字思恭博學有高名爲姚泓天水太守後爲司馬卒於仇池逸伯父遷爲姚萇尚書左僕射卒於長安

趙超宗天水人身長八尺頗有將略太和末爲豫州平南府長史帶汝南太守加建威將軍封尋陽伯在汝南多所受納比官河東更自修厲清靖愛民百姓追思之諡曰成伯子懿襲爵歷員外常侍尚書郎

趙 遐天水人初爲軍主從高祖征南陽後爲梁城戍主後以戰功爲輔國將軍出守滎陽遷光祿大夫卒官平西將軍汾州刺史諡曰襄子子獻襲爵

姜 儉字文簡天水人少有幹用勤濟過人起家徐州車騎府田

### 甘肅新通志

### 卷六十七

人物志 羣材二

吳

曹參軍轉太尉外兵參軍蕭寶寅出討關西引爲開府屬軍機謀略多所參預儉亦自謂遭逢知己遂竭誠委託寶寅爲雍州仍請爲開府從事中郎帶長安令儉弟素武定末中散大夫

周李 虎隴西成紀人李暹裔孫天賜子也官至太尉與名公李弼等八大將軍伐魏有功皆賜爲柱國號八柱國虎卒諡曰襄周保定四年追錄佐命元功封虎子昞爲唐公

李 弼字景和隴西成紀人從周太祖破齊師以功封趙國公每征討朝受命夕便引路略不問私事性沈雅有深識故能以功名終曾孫密志氣雄遠少襲父爵隋末兵亂自稱魏公

李 榘字雲傑弼弟也長不盈五尺果決有膽氣爲周文帝帳內都督以功進爵爲汝南郡公出爲延州刺史

李 賢字賢和隴西成紀人幼有志氣不妄舉動九歲從師受業



略觀大指至於忠孝之道實銘之於心年十四喪父撫訓諸弟友愛甚篤授原州刺史後又授河州總管大營屯田以省漕運多設斥堠以備寇戎羌渾斂迹不敢犯塞徵拜大將軍天和四年卒諡曰桓

李遠字萬歲賢弟也幼有器局志度恢然屢以戰功進陽平郡公授河東郡守敦獎風俗勸課農桑修守禦之備百姓懷之後破東魏兵進左僕射柱國大將軍卒諡曰忠

權景宣字暉遠天水顯親人父曇騰魏隴西郡守贈秦州刺史景宣曉兵權有智略仕周爲南陽郡守除防守兵擾農之宿弊修起城樓多備器械寇盜斂迹百姓稱之後留鎮荊州威行南服授六州諸軍事尋進爵千金郡公

隋李穆字顯慶遠弟也風神警俊倜儻有奇節以奉迎魏孝武功

甘肅新通志

卷六十七

人物志 羣材二

李

授都督從擊齊師於芒山立功擢武衛將軍儀同三司特賜鐵券從于謹破江陵進位大將軍歷官至柱國大司空進爵至申國公建德初進位太保隋高祖受禪穆來朝降坐禮之拜太師子孫在襁褓悉拜儀同一門象笏者百餘人表乞骸骨不許復上表勸遷都詔從之開皇六年卒諡曰明

李詢字孝詢賢子也深沈有大略周武帝時拜儀同三司累以軍功加位大將軍爵高平郡公隋高祖爲丞相尉遲迥作亂以詢爲元帥委以心膂尉遲迥平進位上柱國改封隴西郡公卒諡曰襄

李敏字樹生賢孫也高祖以其父崇死王事養宮中者久之及長襲爵廣宗公起家左千牛美姿容善騎射尚周宣后樂平公主女授柱國煬帝時與從叔渾同爲宇文述構陷死



趙 暉字賢通天水西人也祖超宗魏河東太守父仲懿尙書左丞暉少孤養母至孝及長深沈有器局略涉書史周太祖引爲相府參軍閔帝初遷陝州刺史後以功授開府儀同三司入爲民部中大夫隋祖爲相遷至太宗伯及踐阼以暉曉習故事自相州徵拜尙書右僕射開皇十九年卒

趙 芬字士茂天水西縣人少有辨智頗涉經史明習故事初廷有疑議眾不能決者芬輒爲評斷莫不稱善李穆討齊引爲行軍長史開皇初拜尙書左僕射出爲蒲州刺史加金紫光祿大夫賜錢百萬粟五千石

李 景字道興天水休官人容貌奇偉驍勇善射開皇初以行軍總管伐陳有功進位開府仁壽中檢校代州總管尋以破漢王諒功拜大將軍明年破吐谷渾又破高麗城進爵滑國公

甘肅新通志

卷六十七

人物志 羣材二

五

李 昞虎之子也周封唐公隋安州總管柱國大將軍諡曰仁生高祖於始平實開有唐三百載之帝業其籍始自冀城

權 武字武拊隴西成紀人周開府襲慶子也以忠臣子起家拜開府襲爵齊郡公少果勁勇力絕人能重甲上馬嘗倒投於井未及泉復躍而出從平齊有功增邑三百戶隋祖爲相引置左右受禪後拜浙州刺史嘗以南越邊遠治從其俗務適便宜不依律令仁壽中拜大將軍封邑如舊

董 純字德厚隴西成紀人少有膂力便弓馬在周累官典馭下大夫從平齊有功拜儀同高祖受禪進爵漢曲縣公以平漢王諒功拜柱國後改爲榆林太守以戰功復爲彭城留守

趙仲卿隴西天水人性麤暴有膂力從周齊王憲擊齊下五城以功授大都督齊平遷上儀同入爲畿伯中大夫尋進位大將軍封



長垣縣公開皇初鎮平涼尋拜石州刺史遷朔方總管後以司農卿往益州按蜀王秀獄上以爲能煬帝立判兵部工部尙書卒諡曰肅

王仁恭字元實天水上邽人工騎射秦孝王引爲記室轉長道令遷車騎將軍尋拜上開府又以擊漢王諒功進大將軍歲餘改汲郡太守有能名遷信都太守遼東之役以仁恭爲將軍及班師仁恭爲殿遇賊擊走之進左光祿大夫

辛大德天水人大業中爲信安令誅翦羣盜甚得民和會著作郎虞綽得罪亡命抵大德大德舍之歲餘綽爲人所告吏執以送江都坐斬時使者併執大德大德妻泣有怨言大德笑曰我本圖脫長者反爲人告當死以謝綽會有詔死罪得以擊賊自効信安吏民詣使者叩頭曰辛君人命所懸幸君若去亦無信安矣使者留

甘肅新通志

卷六十七

人物志 羣材二

三

之以討賊帝怒斬使者大德獲全

李密字元邃隴西成紀人雄遠多策略散家貲養客禮賢不愛藉以蔭爲東宮千牛備身額銳角方瞳子黑白明澈煬帝見之謂宇文述曰左仗下黑色小兒顧盼不常無入衛他日述諭密曰君世素貴當以才學顯何事三衛間哉密大喜謝病去感厲讀書聞包愷在緱山往從之以蒲韉乘牛挂漢書一帙角上行且讀楊素適見於道按轡躡其後曰何書生勤如此密識素下拜問所讀曰項羽傳因與語奇之歸謂子元感曰吾觀密識度非若等輩元感遂傾心結納大業九年元感舉兵黎陽遣人入關迎密密至爲謀上中下三計既去入關爲邏所獲以計脫去之淮陽歲饑削木皮以食變姓名爲劉智遠教授諸生自給鬱鬱不得志哀吟泣下人有告太守趙陀者陀捕之復亡去以策干東郡賊程讓破金隄關



徇滎陽諸縣皆下讓分兵與密別爲牙帳號蒲山公密持軍嚴然戰得金寶盡散之繇是人樂爲用取興洛倉發粟賑窮讓等乃推密爲主建號魏公鞏南設壇場即位刑牲歃血改元永平大赦以讓爲司徒城洛口隋虎牢將裴仁基以所部歸密以仁基爲上柱國移檄州縣列煬帝十罪天下震動護軍柴孝和說密曰秦地阻山帶河項背之亡漢得之王今公以仁基壁回洛翟讓保洛口公束鎧倍道趨長安百姓誰不郊迎是征而不戰也眾附兵強然後東向指揮豪傑天下廓廓無事矣今遲之恐爲人先密曰僕懷此久顧我部皆山東人今未下洛安肯與我偕西且諸將皆羣盜不相統一敗則埽地矣遂止唐高祖起師太原密自謂主盟遣將軍張仁則致書於帝請以步騎會河內帝覽書笑令溫大雅作報書厚禮尊讓密大喜示其下曰唐公見推願天下無可慮者遂專事

甘肅新通志

卷六十七

人物志 羣材二

三

隋自是大小六十餘戰以猜嫌殺翟讓心稍驕人心始離武德元年王世充悉眾決戰裴仁基獻策密不能用軍果潰亂投王伯當於河陽及入關兵尙二萬高祖使迎勞冠蓋相望密大喜謂其徒曰吾所舉雖不就而恩結百姓山東連城數百以吾故當盡歸國功不滅竇融豈不以台司處我及至拜光祿卿封邢國公殊怨望高祖詔密以本兵就黎陽招撫故部曲經略東都馳駟東至稠桑驛有詔復召密密大懼謀叛盛彥師斬之年三十七

唐權 允字幼明略陽人童子時舅氏崔湜奇其文以爲無忌之侶拜監察御史著作甚富當時學者咸宗之

李 揆字瑞卿系出隴西成紀揆性警敏善文章開元末擢進士第補陳留尉獻書闕下遷右拾遺以考功郎中知制誥扈狩劍南拜中書舍人以諫立太子拜中書侍郎同中書門下平章事修國



史揆美丰姿善奏對帝歎曰卿門第人物文學皆當世第一爲入蕃會盟使拜尙書左僕射由蕃還卒鳳州贈司空諡曰恭

權 達略陽人世以文采政事爲二千石法有士行吏才歷咸陽縣丞循理蹈和又權隼臨穎令伋之子天寶末州里舉經明中正後守河南尉官至華州司士所至必聞其政而又學古不怠

趙 昌字洪祚天水人始爲昭義李承昭節度府屬累遷處州刺史安南叛拜昌都護遠人向化後入爲國子祭酒復拜安南都護憲宗初立檢校戶部尙書遷嶺南節度使再遷工部尙書復遷太子少保卒年八十五贈揚州大都督諡曰成

權 據字大圭鄉賢德輿子也元和初擢進士歷監察御史有美稱以薦爲中書舍人劾李訓傾覆陰巧且亂國事不宜出入禁中不聽後訓果敗弟珏字大玉亦有名

甘肅新通志

卷六十七

人物志

羣材二

蓄

五代唐景思秦州人爲軍卒累遷指揮使自後唐至漢歷興州刺史貝州鄧州行軍司馬後爲沿淮巡檢有奴以所求不如意誣告景思於史宏肇宏肇遣吏收景思率賴王知權明其冤周世宗以景思爲指揮使以伐淮南功遷濠州行刺史以戰傷重卒贈武清軍節度使

趙延義字子英秦州人仕唐爲星官兼通三式頗善相人周太祖入京師召延義問漢祚短促者天數耶延義言王者撫天下當以仁恩德澤漢法深酷刑罰枉濫天下稱冤此其所以亡也太祖聞之悚然不復用苛刑延義仕周爲太府卿判司天監以病卒

宋尹崇珂秦州天水人初事周世宗於藩邸官至殿前都指揮使宋初出爲淄州刺史有善政民詣闕請刻石頌德太祖命殿中侍御史李穆撰文賜之討平湖南授朗州團練使又與潘美克郴州乾



德中征嶺表以崇珂爲行營馬步軍副都部署克廣州擒劉銀錄  
功遷保信軍節度使未幾南漢開府樂範容州都指揮使鄧存忠  
等叛崇珂復討平之卒贈侍中弟崇珪以西京作坊使領歙州刺  
史子昭吉官洛苑使昭輯供奉官閣門祇候

李仕衡字天鈞秦州成紀人進士及第調鄠縣主簿鞫死囚五人  
活者四人遷大理評事寇準薦其才徙知劍州以擊賊功擢尚書  
度支員外郎歷荆湖北路轉運使徙陝西累遷司封郎中爲河北  
轉運使尋遷尚書工部侍郎權天雄軍再遷刑部侍郎知青州仁  
宗立拜尚書左丞改同州觀察使知陳州凡所至功績爛然歸老  
於家卒子丕緒居官廉靜仕至司農卿家多圖書集歷代石刻爲  
數百卷藏之

劉仲武字子文秦州成紀人熙甯中試射殿庭異等補官數從軍

甘肅新通志

卷六十七

人物志 羣材二

五

累轉爲涇原將夏人犯天聖砦力戰卻之遷皇城使熙河都監復  
湟州進知河州復西甯州後爲西甯都護招降羌酋河南綏定徽  
宗遣使至邊訪得仲武召對深慰勞之問幾子曰九人悉命以官  
錫爲閣門祇候仲武歷知西甯渭西秦州遷步軍都指揮使復拜  
徐州觀察使廬州軍節度使以老提舉明道宮再起爲熙州卒於  
官年七十三贈檢校少保諡曰威肅

趙 隆字子漸成紀人以勇敢應募從王韶取熙河又從李憲破  
西市師討鬼章外河諸羌皆以兵應之隆率衆先至斧其橋鬼章  
失援乃成擒爲涇原將戰平夏川功最多崇甯中鈐轄西河前將  
軍出邈川預復鄯廓後與夏人戰鐵山先登陷陣破之召詣闕徽  
宗慰勞之論燕雲事與童貫不合出知西甯州充隴右都護羌豪  
信服遷温州防禦使本道馬步副都總管卒贈鎮潼軍節度使命



詞臣製碑帝篆額曰旌忠

崔立字本之河池人中進士第爲果州團練推官以議法合理特改大理寺丞知江陰軍教民治水港澆田二千頃開橫河六十里通運漕遷太常卿立遇事敢言前後上四十餘事以尙書工部侍郎致仕

王靖字安之河池人登進士第仕爲金紫光祿大夫純孝忠信教子有義方起家至千石生平謙遜不忤於物不以富貴驕人間里推爲長者子杞柄姪挺俱登進士柄官朝請大夫賜紫金魚袋劉錡字信叔仲武第九子美容狀善射聲如洪鐘嘗從仲武征討牙門水斛滿以箭射之拔箭水注隨以一矢室之人服其精高宗即位差知岷州爲隴右都護與夏人戰屢勝夏人兒唬輒怖之曰劉都護來紹興三年復官宣撫使統制十年充東京副留守部

甘肅新通志

卷六十七

人物志 羣材二

奕

八字軍駐於汴家留順昌至渦口方食暴風拔坐帳錡曰此主暴兵即兼程進抵順昌金人來侵錡擊之殺虜頗眾募壯士百人夜斫其營金人不能測終夜自戰積屍盈野退軍老婆灣烏珠自汴馳至錡復設計大破之棄屍斃馬器甲山積金人震恐喪魄欲捐燕以南棄之會秦檜議和乃止後金人望見順昌旗幟即退走三十一年爲江淮浙西制置使復大敗金師捷奏賜金五百兩銀七萬兩以犒師金主亮南侵舉宋朝諸將問其下孰敢當者皆隨姓名答至錡莫有應者卒贈開府儀同三司諡武穆

張子蓋字德高循王俊從子也初從韓世忠討苗傅補承信郎又從俊擊劉猷授宣贊舍人十年以興復宿毫功遷登州防禦使海州之役子蓋督諸將殊死戰敵大敗圍遂解尋復來戰子蓋再率精銳擊之獲其車馬鎧仗萬計孝宗召對授檢校少保淮東招撫



使卒贈太尉諡恭壯

張 鉉字功甫俊曾孫自幼刻苦問學澹忘榮利終日矻矻攻詩與尤袤陸游輩過從唱酬詩名相伯仲寓居杭州南湖得曹氏荒圃築堂治池館樹梅三百餘本集文人韻友晨夕吟詠其間史彌遠之圖韓侂胄鉉時爲右司郎中預參密計韓既誅史心忌鉉諷言官劾之貶外尋得旨放還後又謫象州卒著書見藝文目錄

董 湜天水人好讀書以教子爲樂住京師以錢萬緡買監書歸後其四子經登能書科綬緯同擢第而約繼之

楊 堯兩當人少刻志於學仕爲進武副尉

金傅慎微字幾先秦州沙溪人後遷居長安宋末登進士累官河東路經制使與金師戰被執送至元帥府元帥宗翰愛其才學弗殺羈置歸化州希尹收置門下宗弼復取河南地起爲陝西經略使

甘肅新通志

卷六十七

人物志 羣材二

七

尋權同州節度使事明年陝西大旱以慎微爲京兆鄜延環慶三路經濟使許以便宜慎微募民入粟得二千餘萬石立養濟院全活甚衆改同知京兆尹權陝西諸路轉運使復修渠溉田民賴其利轉中京副留守用廉改忻州刺史累遷太常卿除定武軍節度使移靖難軍忤用事者遇救得免大定初復爲太常卿遷禮部尙書兼修國史卒於官慎微博學喜著書嘗奏興亡金鏡錄一百卷性純質喜談兵

元雷震亨字時暢秦州人天作第三子太宗時以陝西行省僉事從皇子闊端征秦鞏遂入蜀大軍取襄郢以震亨督糧運禁止殺掠撫安新附積功遷河南行省參政嘗諫征高麗不納師卒無功升授銀青榮祿大夫平章政事卒

趙澣心其先四川清渠溝人澣心以武功事元世祖累官漢陽都



督元帥始家西漢陽遂爲禮店所人掌府事十五年英明善謀廉謹自持時稱邊將之良子梓襲職元帥善騎射有勇力世祖見而奇之賜名普俺帖木兒

楊文安字泰叔天水人幼孤依叔父大淵大淵挾以降元爲元書策取蜀官至東川都元帥中統元年授監軍以戰屢勝授開達忠萬等處招討使至元五年詔充閬州夔東路安撫使蜀境已定入覲以所得城邑繪圖以獻帝勞之曰何若是多也擢四川南道宣慰使進中書左丞行江西省事卒子良之襲佩虎符昭勇大將軍管軍萬戶歷湖南宣慰副使岳州路總管卒

雷衡信字君實震亨子也官龍虎上將軍至順初洮岷番族構亂命衡信往征殺賊幾盡七年番寇又起衡信帥師徑擣其巢降者一十七寨升上護軍都元帥越三年以老乞休訓課子孫以卒

甘肅新通志

卷六十七

人物志 羣材二

美

趙國安寶之弟以兄子尙幼暫襲職至元十五年討叛王吐魯於六盤獲之請解職授兄子世榮帝嘉其能讓錄六盤功進昭勇大將軍招討使世榮遂襲職後以功進安遠定國大將軍吐番宣諭使議事都元帥佩三珠虎符英宗初爲中書平章政事

曹友慶友聞之弟也栗亭人仕元至武德將軍佩虎符討擒西域滿子阿釐從平雲南土夷蛇截功最多晚年致仕居家賙貧濟患鄉里稱之子禹臣行秦州管軍千戶晉臣掌虎符領礮翼漢臣鞏昌總管府同知多惠政友慶弟友善亦有戰功階至進義副尉友善弟友直至征行元帥子舜臣管軍千戶而友諒孫楨亦積功至武德軍鞏昌礮水手萬戶出征河南有殊績賞資甚厚在軍思母涕泣告歸侍養

王思聰字明夫清水人至正中進士知秦安縣事廉介有爲超橫



舍聚訓諸生士民爲勒碑紀德今在 文廟

高冲謙徽州人歷任湖南中路總管取子廉潔時稱清官子宗道才兼文武官至正萬戶効勞行樞密院竄誅奸宄風紀凜然

明高斗南字拱極徽州人明初以州薦授四川定遠知縣惠政多方民爲之謠曰江上高樓鼓角鳴至今吹出斗南聲三載考績以他故下刑部獄定遠耆民赴闕奏其廉能太祖赦之仍命知定遠賜資特優宴而遣之時舉天下廉官斗南與焉九載考最陞雲南新興知州新興人愛戴如定遠居數年以衰老乞閑薦子恂以代上允之厚遣以歸

楊清劉聚皆禮店所人清於洪武中屯兵雷家壩野麻關等處禦番寇立營堡謹斥堠番人莫敢內犯累官至宣禦使司宣慰使後從郭都督征西力戰捐軀勅授世襲禮店所正千戶子孫承襲十

甘肅新通志

卷六十七

人物志 羣材二

堯

餘世聚先起兵鳳陽後歸太祖洪武初守禦禮店所聚卒子政襲職政子宗嘗從大軍征討立功封義信侯卒

雍 清清水人洪武中由鄉舉拜行人當官忠謹摺紳稱之子縉亨孫熙俱舉孝廉其後雍鎬治易春秋二經有名舉於鄉未仕卒鎬子重以恩貢授縣主簿廉直不阿未老遽告歸

高 恂字士信斗南子十二歲通五經博極羣書尤善屬詩文習騎射以父薦召至京太祖奇之命翰林兵部兩試焉文武皆優等授禮科給事中奏劾不避權貴泣父職知新興州時安南王陳日燿爲黎季所弑阻聲教上遣成國公朱能往討之命恂權行司馬大將而下咸聽節制乃以大軍二十萬協能航海趨安南宣揚教化撫順凶逆備諭慰安之意蠻人肅然清平獻功方至新興病卒年三十七三軍慟哭



楊裕李道陳昂俱清水人皆由舉人授官裕於洪武中除河津知縣下車即問民疾苦所不便者除之自始迄去人莫敢干以私尋擢監察御史立朝亦有風采道於宏治中知崇甯縣恤民愛士去後人常稱之昂選知內黃邑多世家號難治昂愷直不阿貴紳咸憚服以薦陞秩而去

高 儒字崇文恂之子以鄉貢授豹韜衛經歷改懷素衛廉謹勤事九年陞山西石州同知佐知州力清逋賦州以大治時徽州又有胡彥祥王謙者皆以良吏著聞彥祥由貢生知肅甯縣以廉介擢御史巡按北直擊強扶弱遷知眉州重農興學累擢山西參政謙由監生知壽州杜遏奔競懲豪橫恤鰥寡號稱神明俸滿當代州民赴京乞留就加參議銜

王 恕秦安隴城人永樂初由衛知事以才進府軍右衛經歷被

### 甘肅新通志

### 卷六十七

人物志 羣材二

本

選督修皇城成祖幸城見恕老成論左右曰此可作臺諫者事竣擢浙江道監察御史巡按廣西復有風力進雲南按察司僉事卒張 翼秦州人永樂中舉人薦擢御史巡按江西歲大侵繪圖上疏請賑詔發帑金數十萬全活甚眾又興修水利以便民還臺後劾中涓楊進怙寵要恩爲中官所嫉致仕歸

劉 紀秦安人永樂間由貢生任工部主事奉勅巡視淮北河道章疏屢上切中時弊

楊信楊禮安懋皆秦安人永樂間信以國子生任爲戶部主事出納維謹禮元兵馬都元帥太平孫也以才仕爲刑部主事以剛斷稱懋以國子生任爲後軍都督府經歷亦有聲稱

胡連字大用胡士濟字澤民胡士淇字澤國皆秦安人連善文辭能詩屢舉不第景泰間以國子生授南皮知縣嚴以懲宄平以近



民盜不涉境蝗不害稼九載考最屢疏乞休吏部嘉其去就特奏許之士濟由國子生仕成都縣訓導以文行導諸生攝縣事慈祥威斷民畏而愛之士淇以尙書毛詩教授號稱經師進仕郝知縣旋告歸

文獻張鳳張鶴年皆徽州人獻成化中舉人歷北直雲南河南巡按御史所至貪吏望風遠遁累遷山東僉事湖廣副使治行益卓著鳳字廷義以貢生歷官王府教授輔導不見聽引疾歸成化末上疏論時政十事皆切時弊鶴年字樂天亦以拔貢歷官秦王府紀善翊贊有功告歸後罄俸蓄濟里黨州人重之

王 爵字錫之秦州人少潛心力學長游周小泉門下教人以誠敬爲本州守秦紘敬之時與講求操存之學宏治初以國學生授保安州判官歸時秦已陞總制矣贈鹽數百石堅辭不受

### 甘肅新通志

### 卷六十七

人物志 羣材二

空

張 潛字用昭錦子也八歲能詩閣臣李東陽奇之授以尙書大義宏治六年成進士累官禮部郎中劉瑾用事潛不一往詣出知廣平府郡稱治遷山東右參政遭誣以計典罷子之桀有孝行詳孝義傳

蘇民字天秀尹瑒字某皆秦州人民宏治中進士授榆次縣知縣廉以直已訟息謗弭徵爲兵部主事改吏部歷文選郎中澄別流品有清譽歷光祿卿節財萬計陞工部右侍郎改南京兵部尋補刑部侍郎瑒宏治中進士授太平知縣剛方耿介民以真父母稱之將擢臺諫改知平定州後以大計誤陷郡邑冤之

丁繼文字宗周李元芳字子實皆秦安人繼文宏治甲子舉人性明敏長於周易亦好古文詞署山西潞州訓導既復除順天學與諸士子惟孳孳問學東脩之禮不問以介節稱元芳正德庚午舉



人任順天宛平知縣奏革都城大弊七事剴切指陳又極言齋醮青詞之惑祈特旨罷免疏上自分必死布襪青衣以候嚴旨及命下竟得俞允宛民歡忭家肖一像祀之出爲登州府同知轉潞安撫按交章保薦藩藩亦請殊擢爲忌者所中遂引疾歸

馬世榮清水人劉邦域秦州人世榮貌魁梧力舉百鈞武宗選充前殿將軍賜一品服邦域天啟中武進士偉貌多力歷官遼東副總兵調征山東叛將李九成恢復登萊累遷總兵官懷宗召對賜蟒服玉帶改漕運總兵駐徐州控扼南北國儲賴焉

羅榮史衛皆兩富人榮官龍安府同知有遺愛衛字康齋嘉靖中以舉人歷任閩鄉原武西華知縣皆著政績升揚州府通判稱廉潔擢戶部山西司郎中卒官

鄭文祿號北園兩富人孝事孀母六十年無少倦學最富尤邃於

### 甘肅新通志

#### 卷六十七

人物志 羣材二

空

易春秋嘉靖末由歲貢判易州升知永和縣調廣昌當道特疏保薦以質朴清恕體國愛民目之

郭 莊字子莊徽州人隆慶二年進士由庶吉士改御史巡按江蘇移按蜀中所在以風力稱入掌河南道主計吏不敢通饋遺再出督學吳中黜華崇雅士風變焉子師游以舉人任臨城知縣聞母訃哀毀卒

雷 龍字雲從秦州人震亨裔孫也自衡信後世襲秦州衛官四世至時清當元末以管軍萬戶全城歸明授鞏昌衛副千戶又四傳至龍幼能文年十五以武庠生襲指揮使職薦升都督僉事鎮守甯夏總兵官隆慶二年以屢破寇功升世襲指揮同知萬曆初移鎮宣府特旨稱其久政著勞虜酋款順邊境甯謐加升右都督特進榮祿大夫子坊城皆襲僉事培以功襲指揮使



侯嘉宴字桂軒徽州人少貧苦讀茹菜充腹萬厯中舉於鄉選知石樓縣御瓦器啖粗米卻行戶供給升河南府通判監修王府剩銀萬餘兩盡歸之公當時稱爲第一清官遽告歸陝西巡撫張應宸榜其門曰冰檠有聲先是徽有張雲鵬者力學工詩以歲貢任固原學正日登尊經閣披閱藏書以爲快教二子紳紘俱成立紳由拔貢官無錫丞紘以舉人授朝邑教諭士服其教後陞新樂知縣

桑世雄秦安隴城人王福秦安人世雄以國子生仕爲四川巴縣丞有能聲遷廣東新會知縣政成而民和福以國子生仕爲蒲州知州剛直而識世務政有聲績不爲大吏所動後其女冊爲永和王妃

劉恭李信王璟俱秦安貢生恭信先後知蒲州均有聲績璟官江蘇揚州府通判以一介不取稱

### 甘肅新通志

### 卷六十七

人物志 羣材二

三

王綸字大經李嵐字九雲皆秦安人少時同負文名綸以舉人選湯陰知縣擢折權倖有剛直名嵐以尙書毛詩教授經學尤邃知遂甯縣獎拔陳講於微時後入詞館爲名臣

王克禮清水人以貢生官戶部主事遷刑部郎中治獄多所平反汪澤康誥喬昆皆清水人皆以拔貢仕郡縣有政聲澤官保定府通判廉介不擾苞苴路絕未老即請歸田誥任汾州府同知以廉幹知名昆知唐縣剛直不徇豪貴士民依之如慈父調任他邑遽引退奉親教子以終子應萃由舉人授樂平知縣遷重慶通判晉蜀人皆稱其能亦引疾早歸

雍 恭字南可清水人以拔貢授富川知縣苗疆荒梗又多瘴癘前任皆寄治古寨恭至始修復城池創立廟學招民人懲盜賊革



雜役去濫征建橋置倉皆捐俸爲之聽斷敏速尤善剖曖昧事上官每以他屬疑獄委焉

鄭誥任堯傅李光坤皆清水人誥淹貫經史由拔貢選授永平府推官杜絕請託有廉正之稱堯傅光坤少皆號神童傅以監生判臨清坤以明經判亳州均有政績坤中歲致仕人尤高之

張惠字濟民孫述先字世美皆秦安人嘉靖中惠以拔貢生授保甯府推官兩攝巴州事創立文昌祠重修文廟學宮興利除弊士民稱焉丁憂歸遂不復出親族待以舉火者數十家述先由舉人選交水教諭旋薦升國子監助教再遷太原府通判值北寇逼擾籌運竭心力調判登州以忤當道引疾歸

劉鑾羅楡皆兩當貢生鑾再任國子博士以善教聞楡任教職以考最升襄陽府教授

甘肅新通志

卷六十七

人物志

羣材二

畝

孫巨鯨字子魚徽州人登進士授洪洞知縣以剛嚴爲治鑿渠溉田民樹碑紀績調任南川歲饑請賑先捐俸爲粥以哺餓人獲賊渠升知開州入爲戶部員外郎擢郎中巨璫有求拒之璫亦不敢憾丁憂歸服除仍入郎署中外支銷不如格者雖已檄行必呈堂審正同曹咸推重焉卒於官

國朝

楊名顯字心虞雷蛟字鳳飛皆秦州人名顯以舉人除山西汾陰令以治最擢刑部主事進郎中恤刑山東多所平反出爲廣東布政使除積弊省民財無算蛟回民材武絕倫崇禎十三年闖賊黨掌律王陷秦州密尅時日屠城蛟陰結壯士爲援偵僞王之出潛伏阨路突起斬之從賊皆駭散分踞之賊並殲焉以功擢遊擊職又擊明將武大定於東關順治三年破伏羌賊以功蒙勅賜金牌



趙酉字文山石作瑞字輯五皆秦州人均有吏材酉賦性穎敏弱冠補諸生入貢後肄業國子監銓授吳堡知縣調延長革輕生之俗又補寶山縣創修學宮壇廟陞太倉知州遷知淮安府以治最調蘇州剔積弊因公罣誤効力軍營卒作瑞九歲工詩有奇句拔萃試優等以知縣分發四川初署清溪以才題補雙流歷權什邡綿竹安縣彭縣華陽所蒞皆有政績擢知資州保升保甯府知府以軍功 賞戴花翎升授川南永甯道參贊軍營以積勞卒吳炳高我猷皆秦州庠生劉徽典貢生也吳氏世襲指揮炳獨聰穎勤學尤善教人每課文榜塾門嚴如官試士我猷喜讀書而性嚴整行步不苟亦善教人多成立者徽典耿介不隨士人服之多從遊焉

蒲珩字佩珩劉思敬字嚴若劉繼孝字子述皆秦州人均以文士

甘肅新通志

卷六十七

人物志

羣材二

奎

宰縣而未盡其才珩勤學不怠以進士授廣西藤縣知縣獎善懲奸有明幹聲時吳三桂逆節已著珩遂引退思敬先以拔貢任高臺縣教諭課士之暇恆教民織紡升浙江慶元知縣政聲方起遽引歸繼孝有文名以拔貢授州判分發江蘇歷署華亭婁縣二丞一日念母老遽呈請歸養依依寢膳親爲之忘老輯宗譜修先塋宅憂後起復借補金山縣丞委署震澤縣事擒巨盜殲其黨民爲立長生牌督高家堰隄工日夜行泥淖中大府賢之題調崇明未赴任以勞卒

蒲璋珩族弟倪士冠字袖林雷舒和澤裔孫皆秦州人璋舉順治丁酉鄉試授富平教諭升肅州衛教授捐俸重修 文廟教諸生以禮義儉俗革焉士冠由貢生官鞏昌府訓導見邑士作字無師法多購顏魯公帖教之臨摹咨調敦煌化洽荒陬保舉知縣未赴



而卒舒和亦以貢生訓導扶風革學署陋規邑士爲製文頌德性廉介在官終不釋褐三人皆以訓士知名璋尤善教子本清以貢生任韓城訓導嘗署縣事有善政韓城人爲立去思碑本澤讀書有偉識以監生授縣丞効力河工久之徑棄去本馨最好學康熙丁酉舉於鄉會試旅卒州人咸惜之

張麗字欲樸秦州人善事繼母喜讀書以選拔入太學肄業所交皆天下士年踰七十始選澄城教諭性真樸和易待諸生若子弟士亦親之若父卒於官貧無以殮友人爲助之著有蓮溪詩集行世乾隆間州人任教職者楊潔楊舒曹茵鄒純皆有譽望潔舒皆貢生潔官渭南舒官乾州去而士子思之茵純皆有文學先後舉鄉闈茵官華州學正純官西和訓導士子皆翕然宗之

甘肅新通志

卷六十七

人物志 羣材二

矣

知縣署富順蓬溪補西昌以能擢權資州選士以進士即用分發貴州歷署大邑補清平縣值防務孔棘罄官橐充軍費奉委赴川隴募捐黔饟一錢無私勞瘁而卒

胡端字子敬明太常卿忻元孫也十三居父喪哀毀如成人事母極謹母疾甚稽顙天求代一夜鬚髮盡白母疾果得愈少入太學以養母未坐監中年治經濟之學南遊江淮徧交其達人閱三年乃歸晚而返之靜一手錄朱子大全近思錄暨薛敬軒馮少墟集中精語以爲省身之助與伏羌鞏介亭通渭李青峰講學論文爲忘年交武功孫酉峰講道關中一見端即目爲畏友嘗致書商訂學術焉端既殫心正學行誼尤卓嘗倡建胡氏宗祠又募修秦州文廟躬自督工者閱二寒暑母喪過毀未及葬而歿歿之前夕猶爲子鐸鐫講大學焉州人士公舉孝子請旌



白貢揚秦州增生讀書不治章句以躬行心得爲詣力事親誠養居母喪三年足不至內室聞李二曲講學關中裹糧往訪之李與談而喜曰此真讀書種子也然子老矣書不必多讀祇於身心體驗處着力可也既歸乃絕意科名惟讀近思反身二錄而已先是順治中有歲貢生羅文旦者州東鄉人學亦尙力行事親竭心力晚年專嗜易學築小園讀書其中而乾隆時惇行者儒有歲貢周建基諸生武履敏皆州人建基亦深於易闢逸園蒔花觀書以娛老履敏貫通經史至老手不釋卷教人以立品爲先

潘鳳聲秦州人乾隆甲午科舉人安貧積學每借得人書窮日夜手鈔遂積至等身與通渭鴻儒李南暉相師友學品皆齊名生平無誑言贅行里人呼爲潘聖人孫尊賢舉人官江西知縣

吳廷揚字仲聲秦州人嘉慶六年以舉人大挑補廣東開平知縣

甘肅新通志

卷六十七

人物志 羣材二

七

盜皆遁迹詳增學額再署新安械鬪風息調東莞值大疫爲捐俸製藥全活甚眾道光元年引見以同知分發江蘇尋署上海至則勸捐賑饑民得蘇息上官保奏儘先補用遽以痰疾乞歸吳士贈詩送行者百許

賈師達秦州耆賓金繹北鄉團總師達於嘉慶初教匪犯境圍堡堡人皆恐師達繼垣下見其魁其魁壯之令導路遂引賊沿渭而下州境賴以安堵尋乘間逃歸釋於同治間見賊在堡下掠人剝衣正言責讓之賊目佟姓者本土人也聞言自愧爲禁掠止攻臨去呼釋謝曰君長者也某亦當自覓歸路矣後有陝客來秦佟姓致書問訊蓋已投戈業商焉

倪映衡字南殷楊守愚字省齋皆秦州舉人均以教授終而內行尤篤映衡嗜讀深於經術居家篤孝友誘掖後進接引忘倦治討



古文能探取人奧窔處一時推爲宗匠守愚幼失恃事繼母委曲  
祇奉能轉乖戾爲和平篤愛幼弟諭教懇切其教人循循善誘不  
棄憊塞於科舉利鈍指導尤能曲悉論文必主先正名家不沾沾  
時尙晚年主講天水書院文教日寢盛焉

關應年字喜亭武登瀛字環之皆秦州庠生均以善教聞應年教  
嚴整尤以通經爲務內慧善知人童蒙初來學即豫決其終身家  
貧食指極繁操履峻潔布袍糲食以終身於生徒清貧者皆貲其  
脩金無所問登瀛少聰穎嗜學既入庠學益深造嘗慨天水古大  
縣今乃淪爲僻鄉人不知書以興教移俗爲己任設科訓蒙勤誘  
廣納貧者蠲其束脩尤貧則給之紙筆予之茶飯弟子成名者百  
許南鄉文教自此開州士之以善教稱者乾隆中有庠生周鼎趙  
勤修皆育養貧寒不取脩金曲成人材甚眾嘉慶後有貢生王建

甘肅新通志

卷六十七

人物志

羣材二

矣

績曹端其教法略如應年登瀛云

常殿魁秦州東鄉人有勇力應募爲州營兵嘉慶中換防出關積  
功薦擢參將上官皆奇其膽略數關外將材者必先之常卻退寇  
騎領隊大臣置酒延殿魁對飲且許敘功保薦因殿魁大言觸忤  
遂匿不以聞以參將終於邊

王尙概字季平秦州人研經汲古搜集漢唐說經之書所得甚博  
持論觥觥能自抒其所見爲文亦古勁不俗應道光丁酉鄉試首  
場三藝皆以五經詰題同考官陳世鎔極賞之以爲首薦榜發僅  
中副車第一己亥錄遺對策駁刪詩之說謂東周廢采詩官風雅  
散軼聖人蒐羅之惟恐後但爲次其年世正其殘譌無所謂刪也  
學使者駭其言竟黜不送科自是遂絕意進取生平著述甚富標  
新領異一衷於正武威張澍爲之序藏於家未梓見藝文目錄其



卒也長安隱士盧輪銘其墓

潘尊賢字容堂舒鈞字播若皆秦州人同以舉人官縣令均著循聲尊賢耽讀勤苦博極羣書以大挑授知縣歷署江西上高萍鄉弋陽廣豐縣事補進賢調安義所至以剛斷爲治尤務革污俗剷積弊培士風汲汲爲之如求所嗜以保薦晉五品階然以不事權要竟坐此落職鈞性謹重讀書勤苦類尊賢鄉舉後援豫工例得官陝西知縣攝鎮安署平利勸課農桑增置義塾風化大振改署郿縣臨潼興文教如平利尋補石泉次年改榆林兼攝懷遠咸豐中對調三原純以德化民尋內升通政司知事遂引疾徑歸楊如桂字馥菴聶瑩思字誠一皆秦州人如桂以舉人大挑知縣分發四川歷署隆昌大邑樂至郫縣納溪所至皆頌神明引見出都卒於旅寓瑩思以監生肄業太學充內閣供事以勞授府經

甘肅新通志

卷六十七

人物志

羣材二

完

歷分發山東委理曹州府屬賑務履勘鄒縣水災所至漁蠹悉絕調赴高唐大營差遣保升知縣加同知銜咸豐十年署昌邑縣事擊賊有功解任後委審府縣二局積案勞劇致疾而卒二人皆以吏事知名瑩思內行尤篤子鴻莢副將銜游擊鴻荃山東候補縣丞弟慎典由拔貢官山東知縣有吏才

劉榮基字耀川王曰智字鈍菴李舉字元夏皆秦州人咸同間皆任教職榮基由廩貢議敘訓導歷署平羅伏羌渭源等縣學事回匪犯渭源城屢被圍榮基佐縣令守禦勤力不懈城將陷遣族孫某改裝出避榮基整冠服北向再拜自經於大成殿西牖下事

聞子贈襲如例曰智以舉人任靜甯州學正同治初元回匪犯州境破堡焚村惡燄益張曰智上書當道陳賊情狀且曰某雖年逾七旬良心未死目覩生民塗炭不忍不以上聞當道雖不能用



論者壯之舉道光間舉人積學負文譽家居教授生徒最盛以碾伯縣訓導厯署安定平番等縣學篆所至用經術爲教同治初署隴西教諭適防勇喧鬧譌傳賊已入城舉具冠服將就義旋聞非賊而止論防禦功保加鹽提舉銜尋解任卒

劉述先字子明秦州庠生馬康衢字堯民同族歲貢生也述先清貧勵操生平無干請乞貸事遇豪富人避之如恐浼論事亦鯁挺不阿同治初巡道林之望委司軍需出納矚然一錢不沾敘功薦保知縣不仕卒康衢與兄登衢皆積學教授爲學徒所欽重憤回族之煽亂具狀請出回籍改景教遂率其徒漢紳王訓等募貲修築城垣趣治守具同治四年提督曹克忠招至營典軍書踰歲保舉訓導未選而歿

緱連魁秦州武舉從征江蘇保花翎都司同治回亂巡道林之望

甘肅新通志

卷六十七

人物志 羣材二

七

委帶秦安勁勇屢戰有功四年率所部援甯遠守城屢卻賊九年十二月陝賊竄北鄉堡寨多殘破連魁奉檄賑恤難民瘞骸齎散籽種鄉民稱焉先是乾隆中有武舉緱祖武者官四川提標千總告歸養親伏羌叛回擾州境祖武請兵大營帥鄉勇導官兵破賊於棹兒坪而咸同間武弁知名者又有姚舉吳得喜舉以武舉從征陝西湖北山東直隸髮匪身屢被重創官至涼州中營遊擊得喜以材技選充勁勇隊長驍勇善戰積功薦保參將奉調赴平番剿賊積勞病卒

羅錦章字綱若秦州庠生緱作鎮字伯吾秦州貢生皆以博學善教名重一時錦章器量宏達性情慷慨家甚貧而絕口不言財利惟孳孳以教人爲樂事其講論透關豁人心目雖至愚頑一經啟迪漸歸省悟知以遠大自期故及門入庠登第者統計約六七十



人主事任其昌主隲南講席嘗謂文理昧由師教不明惟自絀若  
門下來者理境清晰知師承有自也子三佩蘭州庠生作鎮自幼  
鎮靜篤實勤學不倦家亦貧不汲汲於治生其教人先令多讀書  
用靜細功學規謹嚴不少寬假從游者愛而畏之故凡功力切實  
文名卓著者半皆出其門下咸同間州人論善教者咸推羅縵爲  
二難云作鎮子承緒光緒乙酉舉人孫用高丁酉拔貢  
王治平字堯天秦州庠生王樹松字鶴亭歲貢生皆以家貧教授  
成就多材治平幼有至性敦孝友學規謹嚴惡世風不古弟子有  
衣服奢侈必嚴誡之使一歸質樸是以遊其門者皆循循雅飭晚  
年門人頌德匾曰樂如賢父子梓山廩生樹松性嚴重有學行勤  
於訓徒至老不倦東鄉入庠登第者半皆出其門下教法亦類治  
平而開發聰明則過之子廷璞光緒間歲貢

甘肅新通志

卷六十七

人物志

羣材二

三

武時可字際亭秦州份生尹可升字書菴庠生均和平樂易年逾  
七旬手不釋卷時可喜讀周易可升尤喜讀南華家本寒素均以  
舌耕餬口凡知交皆愛敬之

徐迎慶字雲五秦州人性嚴重不苟爲笑語以文行重於時屢赴  
秋闈輒因遂絕意進取專心教授門下捷南宮者數人而迎慶竟  
以諸生終

劉兆鵬字程遠星庚弟也少工琴聰敏好學入庠後遊幕遠方而  
學益進尤篤孝友中同治庚午副車壬午舉鄉試第二選授甯夏  
教諭從學者眾升蘭州府教授卒於任

徐友麟字石菴秦州人刻苦力學入庠後因家貧改習賈久之復  
發憤讀書遂登丙子賢書丙戌成進士以知縣即用需次蜀省艱  
苦備嘗將獲差委遽丁父憂服闋復至蜀署缺有日竟病卒經同



人資助始得歸葬

蒲修政字敏生秦州人性聰慧同治初回亂作院試久停修政以奇貧爲賈人司出納晝無暇晷夜則篝燈讀竟夕不寐同治十二年始補博士弟子員乙亥登賢書大挑選授狄道州學正文學爲士林推服數年卒於任

楊 沛字思軒秦州人家貧好學同治癸酉入庠甫踰月即領鄉薦光緒庚辰大挑一等知縣分發安徽借補庫大使調補五河縣以清廉著稱坐事降一級調用踰年告歸行李蕭然卒年六十八王 祐字篤生秦州人天資英爽工於詞賦回亂久停院試未嘗廢讀同治癸酉入庠即得拔萃甲戌 朝考以知縣分發湖北歷署大缺均著循聲未實任卒

張思毅字得五鄉賢慶麟姪也有孝行友愛甚篤以舉人報捐軍

甘肅新通志

卷六十七

人物志

羣材二

三

餉議敘陝西知縣委辦秦州里民局務論功保晉直隸州知州光緒元年署襄城縣事推誠撫字懲頑扶懦良莠畏懷四年大旱首請停徵放欠地丁銀大半詳准以義倉儲穀五千餘石減價平糶以糶錢分貸貧民俟秋成蠲息收還仍擬買穀歸倉穀未買而勞疾作明年卒於省寓

張登瀛字翰臣秦州人事親孝友愛諸弟家貧遊幕二十餘年爲當事所倚重光緒壬午以 恩貢領鄉薦丙戌成進士授刑部主事勤慎趨公尙書長安薛允升器之奏委熱河理刑司執法寬而不弛嚴而不刻於疑獄多所平反以辦理善後事保加員外郎銜又以拏獲馬賊出力保候補員外郎三年差滿當代都護崇某奏留甚力乃勉留半載既旋都爲四川司正主稿尋補授貴州司主事戊戌康黨亂政好事者多依附登瀛決其必敗已而果然有四



川民婦叩闥得 旨交刑部推問某尙書命解原省治罪民婦泣  
訴身攜數金爲扈卒攫去登瀛欲追償之大爲某尙書所斥乃出  
己金給之由是決意請外以直隸州知州截取到陝歷辦學律館  
分校保甲總局農工商礦總局提調又委略陽釐務嚴禁苛索商  
民懷之嘗書楹聯自警云計利敢言工苛懲猛虎恤民原有道術  
陋宏羊差竣藩司夏某知其才可大用即請補邠州且委以三輔  
農田水利事擬上規則數十條將次第行之竟以疾卒子曦己酉  
拔貢

劉星庚字小渠秦州諸生光緒建元舉孝廉方正 朝考用州同  
歸福建候補與當道講論問及四書中何章最爲身體力行之要  
星庚以君子有九思章對當道首肯之從此以學識相高致仕歸  
做衣糲食脩然自得及卒身無長物友人助之始克成葬

甘肅新通志

卷六十七

人物志 羣材二

三

劉永亨字子嘉秦州人光緒丙子舉於鄉丁丑成進士選庶吉士  
散館授編修甲午充陝西鄉試副考官以纂修會典擢侍講 賞  
戴花翎薦升工部右侍郎調倉場侍郎卒於任有 旨照侍郎例  
賜卹先是庚子之變 詔臣工議策諸大臣敷奏後副都御史以  
次均無言永亨獨陳以拳民宜先令出城武衛軍宜先令禦天津  
遽爲當道所呵斥幾及於禍事後人始服其先見嘗慨近來襲外  
人皮毛毫無實際而奢侈過甚謂當挽之以儉以實永亨居官清  
慎有坐鎮雅俗之稱遽以疾終同官惜之著有來青閣日記病篤  
始輟筆于汝冕廕生

張思孝字慕如鄉賢慶麟姪也溫雅有度少受知知州董平章爲  
名諸生光緒丙子領鄉薦益劬於學後任甯朔縣教諭訓士有方  
近鄰有葛汝葆者字叔栳博學能文不阿附世俗光緒庚寅成進



士以知縣即用分發江西因親老不仕日惟奉母讀書以終其身  
丁秉乾字健堂秦州丁家川人沈靜寡言光緒丙子優貢 朝考  
用知縣棄弗就己卯舉於鄉癸未成進士丙戌 殿試選庶吉士  
改官陝西保安知縣值甘回亂捐廉修葺城垣置守具在任踰年  
負累甚鉅告歸士民攀留弗許既旋里主講西和書院士林翕服  
惜年未五旬卒

劉 鑑字鏡塘秦州人幼劬於學性質直無文飾同治初回亂州  
試停踰十年流離顛沛中未嘗廢學光緒乙酉登鄉薦歷主西甯  
河州各書院講席士林推服委署蘭州府教授以父憂未赴任踰  
年卒

張明採字象乾張祖敬字子儒張必昇字騰若皆秦安人碩學善  
教邑士稱爲三先生明採以貢生官陝西安定縣訓導用經術教

甘肅新通志

卷六十七

人物志 羣材二

七

授諸生來學者必勸以行誼論文以秦漢爲宗順治中叛將高一  
恭率賊數千薄城下明採與諸生成均彥何鼎瑞高擢英等率眾  
禦之既而賊益眾萬餘至守備嚴密賊不克攻乃掠南村而去會  
淫雨城圯百四十餘文明採復與均彥等捐貲補葺祖敬少篤學  
於五經義疏皆能成誦及門士最多後官甯夏訓導諸生服教薰  
德爭以研經爲務必昇自爲諸生時即精五禮學常慨禮經爲後  
儒糝亂肆力數十年貫穿周秦以來制度源委參以會典酌南北  
風俗而求其是言禮者多取裁焉乾隆元年舉孝廉方正不赴隱  
居授徒成就多知名士孫慶綰由舉人知峽江縣亦有聲  
路坦然字居易秦安人明末鄉試副榜棄不就順治中由 恩貢  
授襄陽縣丞遷真定府同知教禮讓化惡俗兼攝保安州事活無  
辜罹罪者三十餘家陞知延平府府治有楊龜山李延平廖德明



朱晦菴四先生祠年久頽廢坦然爲修葺釐正求四子後令主祀有擬請尊先賢有子從祀 大成殿疏引疾歸著書見藝文目錄蔡曰逢字方卜啟賢孫也康熙戊戌成進士選庶吉士授職檢討雍正初以詞臣上疏論科場積弊蒙 召對詢及地方利病敷陳甚切 上稱其忠命以御史用會登州府知府缺員時朱軾官吏部尙書舉曰逢 特賜奏對許專摺言事曰逢入境見歲荒民流不待聞先檄所屬發倉粟以賑捕盜賊禁爭鬪創設蓬萊書院一時英才蔚興上游方以次薦進而司道憚其剛嚴交尼之坐屬縣事左遷主事再謫軍營効力起補兵部武選司主事擢員外郎郎中卒於官

薛繼州字子益鄧生桂字蟾枝楊州彥字彥昇皆秦安人繼州康熙戊子舉人選邠州學正精舉業士多從受業訓課有方成就極

甘肅新通志

卷六十七

人物志 羣材二

七

眾晚復精於方書生桂歲貢生甘貧嗜學一介不苟嘗授書縣署縣有官荒地若干畝知縣舉以予之堅不受教育生徒多所成立講學處有碑碣州彥歲貢生善教授秦士多出其門講學處亦有碑碣

徐世節字心白何潛字躍如皆秦安人世節順治丁酉舉於鄉會試不第後選江西石城知縣修城垣革積弊儉以自奉而勤於恤民石城人愛之數年引疾歸裝惟書數篋而已潛由拔貢知湖南善化縣調新甯以決疑獄得情陞辰州鳳凰廳通判艱歸起判山西汾州府攝直隸遼州事所至得民譽

王卿孫琇趙衍序皆秦安貢生卿值隴水侵城隅時嘗築壩遏之後爲聊城訓導調甯夏陞甘州學正署山丹學事有聲譽琇字德符耀州訓導沈默嗜學老而不倦致仕居鄉雖卑幼悉加禮貌五



世同堂衍序補山東長清縣丞署長清利津知縣同官稱其廉介  
吳澄字超西張夢熊字渭非俱秦安人皆以碩才出牛運震門下  
得其時文之傳澄幼通慧讀書過目不忘稍長爲制舉文即橫厲  
絕倫運震嘗謂人曰吾宦隴土英俊多從之游然深造自得能信  
今傳後者詩惟狄道吳鎮文則秦安吳澄而已澄以進士選知河  
南通許縣逾年罷歸因買舟南游歷覽西湖金焦諸勝日與名流  
載酒高吟尤愛吳山之奇欲結茅其下未果卒夢熊少與父兄俱  
從運震游及長博通載籍下筆驚人狄道吳鎮深愛其才以爲可  
入作者之室乾隆丙子舉鄉試計偕卒於京寓

楊子果字碩亭秦安人乾隆乙未進士授湖北長陽縣歷署枝江  
漢川南漳棗陽穀城等縣爲治一本經術蔽囚務服其情不以刑  
威治枝江宜都教匪案得被誣者三百餘人盡釋之總督吳熊光

### 甘肅新通志

### 卷六十七

人物志

羣材二

美

大學士松筠先後治兵于果條列殲賊術及教養便宜數千言敘  
功遷荊州府通判所至士民皆歎韙之告歸葛巾野服以卒子燾  
字元魯嘉慶中以優行入貢幼承家學中年旁涉釋氏而大旨不  
詭於正官延川訓導以母老乞休成就後學多知名士父子著述  
均見藝文目錄

張位字伯素乾隆戊戌進士改庶吉士授職檢討充國史館

纂修武英殿協修於朝章國制人物典籍精思稽核以事罷起

復內閣中書尋告歸制府延主蘭山講席教人平易簡質在官不  
妄干進家居孝友人無間言五世同堂子思誠嘉慶己巳進士授  
庶吉士散館以知縣用歷任直隸沙河廣西永福縣有治聲思謬  
歲貢生思訥道光初由拔貢任陝西盩厔縣教諭父子皆以善書  
聞



李廷彥字豫亭秦安人以歲貢任鄂縣訓導素習兵法捐貲創修黑龍堡見稱於時

李恂字實齋秦安人由廩貢歷任安定訓導秦州學正緣事降調道光十八年監工重修文廟城垣又捐貲重修尊經閣二十六年督修鎮陽關議敘加一級紀錄三次得常州府知事兼理照磨管糧臺府庫團練水營軍又疏通河道造帳棚鋤鋤建育嬰普濟敬節等堂以賢勞著稱

李謙字撫之李蓉鏡字鑑堂皆秦安人均以文藝見長卒成進士謙選授四川酆都縣防盜興學政化大行又重懲僧道之煽眾者敬俗以革以親老乞養歸卒於家蓉鏡以知縣分發湖南署耒陽縣補湘陰委鞠逆黨之煽亂者不濫殺一人又書陳善後事宜五條大府爲奏請飭行尋升署道州知州蒙召對清問中外驚爲異數鴉片流入中土蓉鏡騰書大府力請禁遏剷除患本議格不行明年引疾卸事

甘肅新通志

卷六十七

人物志 羣材二

七

成兆南字召棠秦安人少讀濂洛諸書嗜之慨然以聖學自策勵道光中舉於鄉歷任涇陽伏羌靜甯安西州教職所至倡明正學以身作則自安西移疾歸顏其廬曰尋樂日與生徒數十講肄其中兆南之學雖宗濂洛而於格致一義深是姚江嘗倡議規東山築長堡作縣城屏蔽堡成城賴以完八年七月卒

路天基字養齋秦安人天資明敏讀書過目不忘道光戊子舉於鄉大挑得教職歷任平涼崇信教諭截取知縣歸里後主講景權書院成就多人邑宰程履豐嘗以所作就正天基援筆改削程爲心折又雅重其品稱爲清節先生以固窮終

孫振聲字翰蜚秦安人道光甲午以優行貢博綜羣書肆力詩古



文教授生徒以敦品研經相勸勵不矜尙詞采性愛名山太華吳嶽石門麥積諸名勝遊歷殆徧同治中避亂蜀中以卒子海另有傳

孫 海字吟帆振聲子咸豐辛酉拔貢 朝考以知縣用分發江蘇因親老改官四川歷任閬中成都富順遂甯等縣所在稱治成都爲省會首邑值部使查辦事件供張咄嗟立辦終事無誤遂甯爲商賈輻輳之區前令某因厲民致罷市海至理論之咸悅服教士某袒教民訟不已海聞示以誠教士反以情輸而訟息後以蜚語被議久之大吏知其誣委辦豫晉賑捐並涪萬官鹽事務旋開復原官以母老奉侍歸里光緒辛丑從提督夏毓秀辦理文案卒於山西韓侯嶺營次海才學瑰奇尤擅書名獲之者珍若拱璧所取士如宋育仁費道純周崇禮殷咸宜皆有名於時生性揮霍歷

甘肅新通志

卷六十七

人物志 羣材二

美

任官資隨手散去逋欠者至不能指名亦無券可稽故晚年窘於用云所著詳藝文目錄子兆榮候選知縣

宋仰廉秦安監生同治初遭回變起眾以仰廉智勇推爲團總率團禦賊保護鄉民耕穫鄰莊十餘胥賴以安賊圍尖山堡垂陷仰廉夜率團眾赴救至則力戰三時賊始奔退堡人斂金數百助火藥之費仰廉一無所受乃獻羊豕犒軍焉

巨 源字少海秦安人學既成以親老家貧應聘充邑宰幕賓宰叩及邑中某事某人則正色曰此非幕中所當言陝甘學政賞其詩賦辟閱試卷既而欲以優行貢源辭焉曰迹近私非敢居也鄉試五薦不售遂絕意進取與弟潭終身同爨邑長老論友恭者輒舉以爲式卒後成兆南誌其墓略言少海之學由靜入世徒震驚其文名而未窺其用力之所在云



張浴德字素儒秦安歲貢生幼穎悟好學年十七補博士弟子員嘗考究古昔封建井田之法洪範九疇之數排九宮布八卦溯源於河圖洛書而會歸於太極之一圖晚年酷嗜風騷凡樂府鏡歌及律古各體無不得其三昧所著雜文亦皆卓然可傳

蔡輔清字夢若秦安 恩貢生鄉試屢薦不售乃曰人生貴適志耳安用久困筆硯間乎遂絕意進取課二弟及子姪輩讀書學規嚴謹又終身與弟姪未嘗分爨同治初隴上軍興當道以督辦城防敦請辭不獲已遂起任事建北郭爲城屏蔽城賴以全巡道林之望有遠志難忘姜伯約戎韜須仗尹淄州楹聯之贈以功加藍翎六品銜原選州判即補教諭卒後邑人思之

巨 潭字鏡舫源弟也少以貧廢學年十九見兄入庠始欲讀書以父不許憂憤成疾父以檢討張位勸令讀乃許之疾果愈始讀

### 甘肅新通志

### 卷六十七

人物志

羣材二

堯

毛詩有所得削楮註之見者詫爲異才入學後鄉試未售遂不復求進取專以講學授徒爲已任所成就前後數十人孫江孫海安維峻等皆出其門下卒後門人不忍遽散於講學處共居期年乃分投師子國榘庠生國桂光緒乙亥舉人官阜康知縣

安 仁字體元秦安人衍聖公齋奏廳至性過人中年喪妻不再娶事母張以孝聞兄弟間怡怡如也少時家貧失學就鄉先生問字質義退而探索久乃貫通於是徧覽經史鈔書盈篋擇先儒格言別爲一編身體力行邑令王汝銓有真人品之目後家道裕樂善好施村中有巨壑礙行人仁捐貲督築成坦途官橋遭河漲沖沒慮鄉人被官刑代爲賠修學通星象堪輿嘗往曲阜瞻仰孔林忽夜觀天文知關隴將有變中途馳歸既至規西山穿底洞由南達北至絕澗可得水處止未幾回亂作一日賊虜至縣川斷赴城



路鄉人憶及此洞皆挈眷避入卒得全軍興之初毀家紓難不足  
又轉貸益之而身任其值邑南郭回族百數十家皆安分營生或  
藉口清內患謀襲殺之仁聞信白之當事謂冤及無辜適自禍耳  
事遂寢年七十二猶健步同治壬申仲夏歷登邑境四山周覽回  
謂友人曰今秋當告別踰月竟抱疴子永吉延醫診治卻之曰數  
有一定歸期其七月廿四乎八月某日當葬我又語次孫維峻曰  
我生平多陰德事食報當在汝宿債汝其償之然此債所全活者  
眾也屆期果卒邑人胡仲熊云

胡仲熊字西垣秦安歲貢生幼承家學及長博極羣籍雅擅書名  
尤長於詩與鞏秦階道張瑞珍詩筒往還張亦有惹我吟梅詩興  
動惱人飛驛羽書傳之句即酬仲熊作也軍興襄辦城防次子野  
充團長戰死同事者弔焉仲熊揮淚曰小子以死勤事固其分也

甘肅新通志

卷六十七

人物志 羣材二

卒

治軍事如故又設帳城中諸生或因軍務戒嚴曠功仲熊勉之曰  
若但勤讀世宙自在耳以故金戈鐵馬中絃誦聲不絕後署成縣  
訓導卸篆歸家益貧賦安命詩見志卒後知縣程履豐厚貲且派  
役經理其喪焉

彭繩祖字觀堂秦安隴城人六歲就傅過目成誦家貧攻苦晚年  
登進士第分發河南署嵩縣事捐廉修城捻匪來圍攻繩祖登陴  
守禦晝夜不懈轉危爲安去任時士民攀轅走送數十里後以捍  
寇功保 奏加運同銜以直隸州用旋補南召縣政聲益著告歸  
年八十有五卒著書見藝文目錄子三長泳舉人甯夏縣教諭孫  
五繼宣河南府經歷在任廿餘年有諳練稱嗣宣夏邑縣典史綿  
宣諸生

張齡鏡字心若必昇曾孫也生而敏慧儻不受羈勒及長驅幹



豐偉內行修潔與弟舉人桐鳴友愛甚篤同治初逆回亂作時文武酣嬉遇賊輒畏縮齡鏡慨然曰此吾致命遂志秋也奉文招募健兒數百躬自訓練遂成勁旅城防賴焉七年秋陝回陷北郭將攻城齡鏡誓眾守陴目不交睫者數夜鬚髮皆白賊不得聞乃退去侯十別部擁眾至秦齡鏡整隊嚴防秋毫得無擾當事者上其功賞戴藍翎加四品銜將破格錄用會某大吏去職不果乙酉春感微疾卒年八十有五弟桐鳴由舉人知縣主講洪洞書院卒張文炳秦安庠生爲人和易寬厚終身未嘗與人有所爭競事善醫痘昏夜必赴從未受一錢謝縣東有任家莊居者數十家莊後忽裂巨縫勢將崩眾洶懼議遷徙附近有地者乘急勒厚值文炳亦有地若干畝曰此性命危急事何議價爲任居之日後隨意可也其他厚德皆類此

甘肅新通志

卷六十七

人物志 羣材二

全

趙 棟字伯權秦安隴城歲貢生同治初回亂鎮城當南北之衝賊晝夜圍攻六七日鎮人方寸皆亂棟獨慷慨誓眾設謀防守賊不得逞城賴以全生平守正不阿品節冠一鄉人有疑難得其一言立斷卒後廿餘年人猶思之

張景軒字步庭秦安庠生浴德姪也性沈潛行止端方同治初回亂作城防戒嚴景軒奉縣諭稽查城門出入終事無誤後管理倉糧出納惟謹知縣程履豐優禮之謂爲今之古人

汪澄圖字時泉秦安廩生以學行重於鄉家素貧設教家塾歲不下數十人稍遠者供饌秋雨無薪至破舊扉爲炊而束脩之多寡不較善岐黃嘗刻保產輯要贈人延請者無問貧富輒往病已不索謝日本短視老年行步需人後忽開朗愈信厚德之報云

楊天培字因之張西銘字仁夫皆秦安人天培少失恃父撫教成



立困苦中學不少輟咸豐乙未舉於鄉同治閒逆回陷北郭天培時居南郭賊退與成兆南巨潭倡練民團保衛地方約束嚴明民不滋擾旋以大挑得鎮番縣教諭俸滿陞甯靈廳教授以病歸後又署環縣學篆士皆愛戴西銘鄉試未售課徒自給同治閒逆回多陷堡寨獨西銘所居梁家堡堅守得全方賊勢正橫人思逃逸西銘謂眾志可以成城慷慨誓眾躬親督禦與賊相持七晝夜殺傷頗眾賊遂解圍去中年精醫術凡診治就痊無貧富均不索謝壽八十七無疾終

張守紀字肇修橫渠先生裔孫也溫雅有度與人接喜怒不形於色弱冠入庠即設帳教授成就後學極眾繼乃潛心靈樞素問精方術邑令程履豐亦於醫道三折肱聞守紀名延入與語奇之謂其品學兼優邑中無貧富延請輒往至餽謝一絲不受同治閒兵

甘肅新通志

卷六十七

人物志 羣材二

全

荒交迫悍將驕卒日向邑令索糧稍緩則鞭箠及之守紀輸金助餉家用遂匱日僅一餐雜菜根充飢處之晏然曰青青者如許何過慮爲及麥秋果大稔人服其鎮定生平隱於酒終日飲不醉臨臥亦須飲年八十無疾終人以爲酒仙云

鄧銘堂字敬軒秦安監生幼承庭訓孜孜爲學年十八喪父時家貧甚遂棄儒業賈孝養以贍其家家既裕舉河西近莊田分之妹以慰母心產業皆手創與弟升堂共之無德色鬢毛俱班猶和樂如孺子同治戊辰歲大饑家無餘粟極節省分拯戚族光緒戊寅又饑因邑宰議賑倡義首捐其不便食官賑者復出私粟贍之程履豐宰秦安時重其義行凡有興築壹以委辦雖任事足跡不入署縣令黃某重修景權書院復以督辦見屬工堅費省有公正無雙之譽書史過目成誦每發一論類能指陳要領性剛直遇人有



過輒面責及與他人言則曲護之多所成就嘗訓子姪曰爾曹讀書不第宜習勤尤貴能耐苦即他日得志無忘此訓其甥安維峻少時因兵燹廢學銘堂館之家竭力培植及安通籍請于 朝賜封儒林郎又嘗徵詩爲壽京師士大夫多有贈章彙刊成集名介壽錦言家藏書甚富行年七十猶手不釋卷卒後安復志其墓子廷宣議敘縣丞廷芑優貢生廷蘭有孝行早卒

安永吉字子貞仁子也髫年居母喪哀毀如成人稍長勤學好禮侍父前竦立終日無惰容及羣從析產於田宅獨取其瘠陋者曰吾食指少易給也入庠後即課子姪讀且集族鄰子弟可教者授以經來學日眾束脩之奉分毫不受鄉試屢見遺以歲貢生注選訓導累 封至中憲大夫兄國瑞出繼於外與叔父信皆老而貧吉供養無乏及後復身任葬事諸姪無宅者授之室族黨鰥曠者

甘肅新通志

卷六十七

人物志 羣材二

全

營其婚其厚德多此類有子五次維峻初由拔貢授京秩或謂京官清苦難久居吉諭之曰爾非州縣才居此官尙可讀書且仕非爲貧惟當隨分盡職豈可先計祿入之豐嗇館選後赴京就散館試以家貧擬改外則嚴飭之曰貧乃分內事官須聽 上授安可自便身圖及由編修考改言職補福建道監察御史又誨以建言之道勿拾迂談勿畏彊禦勿毛舉細故勿倖直沽名語尤峻切踰歲海疆事棘當路阿附養亂維峻抗疏劾其罪狀迨款議興誓以死爭先函稟父曰兒早晚必獲罪倘事至不測願以兒爲死得其死所無過傷懷疏上即謫戍軍臺吉聞信不驚亦不戚覆書惟教以毋忘 聖恩毋怵禍變節康有爲原名祖詒著書詆聖教維峻具摺嚴參請剷絕禍根爲查辦者所袒釋不問歲戊戌吉聞康黨之譎言亂政觸動肝疾以次年十一月八日卒年六十有九綜厥生



平敦行正學君子也伏羌王權云

王明字曉峰秦安隴城鎮廩生初赴州應考未售憚父教嚴不敢歸孤寓城南蕭寺中州庠生曹貫千見而問焉告之故即引諸門牆飲食教誨明勵志苦讀寢食俱忘三年遂得入庠父歿哀毀踰禮州人益敬服之因留設館大家子弟咸來受業厥後入泮登科者以百計侍郎劉永亨其最著也同治初回亂作明迎養其母並挈家至值歲大饑斗粟值五千餘錢館穀不能給而奉母未嘗少缺母尋歿以不克備禮引痛終身季弟哲喪偶繼娶費明以身任之及姪生而其母旋亡哲又出外明夫婦撫之如已出稍長教之讀弱冠即入庠後歸里長姪析產獨取贏明不與校仍回州設館舌耕自給卒年六十餘諸弟子哀痛營葬爲立石銘德題曰瓣香敬祝

甘肅新通志

卷六十七

人物志 羣材二

舍

高震字雲卿秦安人中光緒乙亥鄉試官平番縣訓導課士勤劬以直忤上官旋告歸居鄉以禮法自守不干謁官長創建祠堂敬宗收族平生設帳授徒門下採芹食餼者三十餘人並有登賢書入詞林者厯主河陰蓮峰兩書院講席士之以科名起者復多成就後學之志至老不衰卒後士林論其教澤僉謂有古風焉又李諤字愷堂世居縣北鄉與震同年相友善亦以教授生徒有聲桑梓門人領鄉薦捷南宮者數人諤性誠樸以足疾未仕卒

雒錫麟字漢閣秦安廩生沈默端雅居喪盡禮禫猶不入內寢弟錫祺祧長房錫麟終其身與之同爨界家政於弟自以講學授徒爲事性喜施與或以家貧爲言則曰必待有餘以濟人終身永無足之日矣三十後悟寡過之難嘗作十五箴以自警大要以省身克己爲主又著有懲忿說希聖子傳儉約論並手編經史語錄淑



身要錄各種年甫四十以疾卒士論惜之

侯 垣字乙青秦安人由優貢領戊子鄉薦家貧應知縣彭福孫教讀聘藉館穀養親有因訟事謁垣者卻之曰人當自反何如耳且縣令何爲余焉知此知縣劉至順涖秦館事如故劉調補山丹縣仍邀之去縣試閱卷或求關節垣屏之且曰勿言生姓名言則害生也嘗從友人出居庸抵沙塞周覽山川形勝著爲圖說又酷嗜陸宣公奏議故爲文敷暢剴切屢躋禮闈值改學官知縣張時熙以師範薦抵省爲高等學堂教習垣推誠待士謂當勉爲有用之學不可虛糜巨款負大吏栽培逾年新疆以師範請當道命垣往臨行贈壯遊玉關四字既至教士勤勞一如在甘時明年以知縣奏留新疆補用未展所學遽以疾終子鎮海隨垣出關鎮東諸生

甘肅新通志

卷六十七

人物志 羣材二

全

徐錫章字倬臣秦安人性狷潔敦品勵行讀書能觀其大比入庠肄業隴南書院主事任其昌嘗器許之中戊子副榜己丑舉人名皆第二戊戌大挑分發湖北知縣以親老不赴從邑人安維峻講求正學尊信程朱斗室之中嘯歌自得一夕夢赴任早起告其兄曰弟本無意仕進昨夜夢涖任旌旂騎卒甚盛今憶之恍若在日中不數日染病卒其側室張氏飲藥殉另有傳

王鏐字陶然傅再說字夢予皆清水人皆以選拔貢成均而辭榮養親以篤孝稱鏐博洽工書乾隆丁酉入貢時開四庫全書館充謄錄者五年議敘州判選次近以親老不赴歸侍寢膳暇惟開塾授經啟迪後進邑令慕其名待以賓禮然性介特終歲無私謁令以是益重之再說積學能文名與鏐埒入貢選城固縣教諭亦以父老堅辭設教里中從遊者極眾父歿終喪始赴郿縣教諭任子



壽庚午副榜康歲貢生皆有文名

張復字來甫清水人幼聰慧年十四入庠甲子鄉試願與諸父同往共憐其幼不許竟先奔及榜發獨中式諸父汗顏後以大挑歷署四川射洪崇甯知縣改江西歷任弋陽南昌都昌知縣所至政績卓著累遷至知府

馬俊士清水人績學能文品行尤端由舉人任陝西鳳翔縣教諭教士有方子挺生性聰敏善吟詠才名著隴右尤善書法以明經登乾隆壬申賢書累舉進士不第人多惜之曾孫元章少承其從祖挺生教勵志舉業晚益勤學遂由乙卯恩賜副榜於嘉慶戊辰恩賜舉人邑宰閻慶元題其門曰四世魁元其時有趙懷珍者皓首窮經與元章同中式清水文風遂由此開

郭相忠字蓋臣清水人嘉慶丁丑武進士以守備籤掣巴里坤効

## 甘肅新通志

### 卷六十七

人物志 羣材二

矣

力從征張格爾克復新疆各城忠樸沈勇歷署喀什哈爾等營守備守邊凡十八載調秦州汛補榆林守備升督標中營都司固原遊擊所至愛養士卒而訓練嚴整威稜屹若重鎮以材任邊防調補貴德營遊擊隨剿撒拉叛番保升參將委署永昌營副將復以破番族殲渠功保升涼州總兵調任肅州請開南山金廠以丁代賑體恤備至邊武頌其仁慈番人懷其德威旋擢甘州提督番部莫敢入犯西陲靜謐咸豐十年奉命統帶甘肅四川貴州兵馬督剿滇逆旋改四川提督次年卒於軍贈振威將軍賞卹加等廕一子入標敘用相忠雖以騎射起家然少喜讀書通史能文戎政之暇不廢吟詠著書見藝文目錄

王翼字鳳翔王受祉字介之馬鳳翼與兄鳳鳴皆清水人翼歲貢生苦志力學善事親設館授徒貧者不取束脩邑宰某贈以表正



文風匾額受祉家貧苦讀性廉明嚴正學品爲邑人所宗仰子祖  
善字蘭亭精舉業善吟詠累舉不第亦以明經終鳳翼鳳鳴俱爲  
諸生性謹厚誠確學以身體力行爲主舉動輒與古合邑士悉推  
爲篤行君子云

劉養鋒字玉屏清水人幼承庭訓由嘉慶辛酉拔貢 朝考以知  
縣用歷官山西陝西四川等省凡任縣十二州四所在以勤慎廉  
明稱於戚族之貧乏者時分廉俸以贍之弟英鋒字偉山癸酉拔  
貢工書任陝西寶雞縣教諭振鋒銛銛俱 貢生姪棻字雲臺丁酉  
拔貢以詩賦鳴隴右旭字再堂聰穎正直登乙亥 榜從孫夢齡  
亦與成均之選子樸由監生任福建建甯府經歷樞貢生桓字春  
浦才氣縱橫弱冠登壬辰鄉榜考授正紅旗覺羅教習少子杭字  
霞舫辛酉選拔庚午副榜乙亥舉人丁丑進士歷署貴州貴定縣

甘肅新通志

卷六十七

人物志

羣材二

七

知縣都江廳同知興安州知州補授興義縣知縣屢充貴州鄉試  
同考官薦取多名士劉氏一門貴盛邑人榮之

馬翰如字良甫清水良回性豪放從關中檢討路德學爲文多刻  
仁在堂時藝內登丁酉鄉舉後以大挑任碾作縣訓導從姪義字  
可象遊學關中逆回之變十餘載不歸後關內肅清始回籍以貢  
生登己卯鄉舉

陳錦文字雲章清水癸卯科舉人性樸厚公直以大挑歷署四川  
西昌鄰水南溪等縣知縣所在以廉明稱歿後囊無餘資

杜維珍字子周王紹祖字衣軒王化行字南濟皆清水人維珍弱  
歲能文學使戴湘浦深器重之文名卓著後以貢生設教而終紹  
祖嗜古能文尤工書法其子延亦善書父子俱以貢生有聲當時  
化行幼孤勤學家極貧有負薪讀書之概精舉業屢薦不售以明



經老邑人惜之

王汝中字執甫周鑫字貢三雍嚴字子恭俱清水人皆以貢生終汝中家貧力學弱歲有文名舉業之精與化行齊名鑫倜儻不羣工詩賦與劉棻齊名生平題詠甚多嚴性質直居家孝友尤好獎掖後進其父長庚與邑士邢丕承同遊學關中爲一時名士弟靜字壽山性沈默亦善屬文父子兄弟俱貢成均邑人皆愛敬之

閻樸字文圃清水人性英敏倜儻不羣夙承庭訓湛深經術弱冠入庠食餼有識者皆以偉器推之同治庚午舉於鄉辛未成進士歷署四川南江梓潼等縣知縣聽斷如流寬嚴並濟解組歸主講本邑書院訓迪有方多所成就立身制行正直不汙著書見藝文目錄

劉俊字見三清水歲貢生有品學同治初逆回叛亂俊辦城防

甘肅新通志

卷六十七

人物志

羣材二

六

聯保甲勞怨不辭克濟時艱後司鐸崇信興學勵士文風丕振子作善積善俱入庠以孝友稱

傅思永字慎齋清水人性穎敏逆回之變家居關中登庚午鄉舉辛未春闈見擯後卒士論惜之

張彭齡字蓮泉清水增生鄉試屢薦不售以善書稱敦厚倫常栽培後進慕橫渠遺風年近九旬猶手不釋卷兩孫浴澍同榜入庠張耀祖字勉齋清水恩貢生學問淹博士林引重行文不趨時尚屢困場屋以設教終

王廷極禮縣人康熙中歲貢選貴州普安縣知縣調河南確山輕科徭育孤寡除強暴仁惠之聲四播確山人爲立生祠在家孝友篤誠虔修祠祀收恤族黨捐貲修大成殿明倫堂饑歲賑濟貧民全活無算子三長邴由庠生官直隸縣丞升霸州同知次郟候



選州同季躡官貴州平遠州吏目乾隆中致仕歸會邑大旱大潭一里麥禾盡槁縣令催科如故躡憫之舉一里錢糧代爲輸納里人德之勒石以頌五十四年捐學田二百五十餘畝取租供書院膏火邑士賴之

郭履泰字孚五趙桂林字馨山皆禮縣人均碩學善教履泰乾隆丁酉拔貢嘉慶初舉孝廉方正主講天嘉書院教學者先擴器識毋以文藝自封士子爲立碑記德子人杰復以辛酉選拔主講文風丕振桂林道光壬午舉人亦主講書院勲懇善誘一時名士皆出其門歷任臨潼安定教諭沐其教者多掇巍科姪東陽以己酉選拔繼桂林主講亦爲士類宗仰

郭恆泰字袞瞻履泰弟也性聰慧品學優與兄同以貢生顯主講成縣滄泉書院從學者眾選授固原州學正卒於任子人靈字秀甘肅新通志

卷六十七

人物志 羣材二

允

升貢生有品學長於詩歌

何濟舟字松崖禮縣人嘉慶戊午舉於鄉大挑一等官山東臨清州州同歷知新泰高苑嘉祥等縣在高苑日積年逋賦請俟豐年帶征釐正稅法輪省而課入反贏革除倉儲分派積弊民不受累審保甲嚴緝捕盜賊以清去官時士民匾頌曰澤被羣生子庭萊由廩貢官訓導庭槐舉人庭茵庠生

王元卿字特衡禮縣人道光初歲貢性耽山水多識堪輿家言讀性理諸書反身內證始有心得自是棄舉子業專心爲己之學題其室曰退思齋於先儒語錄搜覽無遺教人以養性爲宗立誠爲要踐履倫常爲實際論者以方秦州白貢揚著書見藝文目錄馬昭字子明禮縣人以貢生設教幼失怙恃事繼母孝誨人必以規矩門下採芹食餼者多持躬謹慎即小閑不稍踰有來謁必



衣冠禮之著有詩鈔未刊門人爲立德教碑子應掄以 恩貢任甯夏教諭亦有學行士林翕服

王揆一禮縣附貢生任江西建昌府同知歷署雲南嵩明昆陽等州知州所在有善政嘉道閒歲值凶荒出糧賑濟全活極眾子槐齡字值三歷署四川永川縣松潘廳管理西藏錢法事務所在有政聲精八分隸書彭齡字仲錢道光丁酉選拔是科即登鄉舉考授內閣中書候選知縣淡於仕宦設帳鄉閭門人爲立德教碑

劉燦蔡字炳如禮縣附貢生性愷悌事繼母撫弱弟以孝友聞行已接物寬厚不苛察道光己亥重修 文廟燦蔡倡義集捐董成其役子廷桂天性雍和不見涯涘亦由庠生例貢成均術通岐黃尤精鍼灸有求診者隨手立愈謝禮概卻弗受同治戊辰出粟賑饑鄉里呼爲善人

甘肅新通志

卷六十七

人物志 羣材二

卒

蒙頌賜字芹塘禮縣人早失怙恃事祖以孝稱弱冠入庠旋食餼咸豐辛酉拔貢主講禮興書院教人以敦品爲先後歷任海城華亭等縣教職所至皆有教澤

徐兆祥字瑞菴禮縣廩生同治初軍興襄辦本城公務二年鹽鎮回亂起襄辦城防守禦同心城賴無恙五年委辦捐輸亦著勤勞六年委辦糧臺事敘功蒙巡道林某委署西和縣訓導時軍務倥偬未即赴任九年委協辦採運局飛輓有方始終如一 賞給國子監學正銜十年七月因辦公自輦歸積勞病卒

王篤本字寶之禮縣人明王恕之裔孫也事親以孝聞早歲食餼嫻字學真草隸篆俱精家貧以貢生設館藉筆耕事畜不趨時勢好詠歌結社與王仲錢諸人爲友著有蔭古精舍稿未刊成就後學極多同治閒協辦城防獎六品銜



任紀瑞字雲五禮縣貢生弱冠即能文肄業關中嗜書如命不釋手自經史百家外於程朱諸書致力尤篤識者不僅以文人目之也

梁蔓春字悟吾禮縣人辭氣謙抑絕口不言人過非先儒理學書不肯寓目家貧絕意進取不應有司之試座右懸理欲圖一幅終日凝神對坐以體認善念惡念之分途弟某字茂亭學品與蔓春略同而旨趣各異峻崖岸人有過舉輒面斥之

增生楚凌雲字漢章同知何騰漢字雲亭皆禮縣人凌雲以恭兄聞設教鄉里裁成多士門人爲勒碑記之子二俱入庠次方城亦以恭兄聞曾孫國樑貢生騰漢光祿寺典簿事親孝待姪如子下及臧獲皆以厚德處之門庭內雍雍如也同治間回亂騰漢捐貲築堡垣製器械出所蓄糧分給堡人作守禦資當危急時嘗乞師

甘肅新通志

卷六十七

人物志 羣材二

空

爲外援並集債戶舉券焚之以勵眾固守堡卒得全子其正早歲入庠

李應紫字秀峰禮縣人幼即岐嶷事繼母以孝弱冠遊泮旋食餼工書能詩歷充幕賓謹慎緘默不爲習染中咸豐己未副榜同治癸酉舉人光緒丙子進士壬午以知縣揀發奉天署鐵嶺縣事善政宜民有頌聲保加同知銜儘先補用知州再任鐵嶺士民歡呼謂生佛重臨已而卒於官上官助貲乃得歸葬

劉拱禮縣廩生副貢執禮子與弟強皆刻苦勤學以養親故設帳里門教人以正學爲宗不受脩金故從遊者眾而成就者極多門下士樹碑紀德邑宰亦有高山仰止匾額之贈

林含華字實之禮縣人家貧苦讀事親孝早歲入庠同治癸酉由廩生領鄉薦歷任成縣教諭階州學正主講禮興書院嚴於訓課



戶部主事焦志賢山東知縣張一心皆其門下士

韓慶雲字子餘禮縣人幼孤事母能養志奉胞叔委曲承順終得合爨同治初回亂慶雲奉縣諭勸捐人皆踴躍輸將每遇災荒即倡捐賑濟晚年家計蕭條處之晏如光緒癸巳夏無疾而終季弟書雲字幼如舉優行以貢生終

楚國梁字伯任陳士彥字伯英皆禮縣歲貢生國梁能容人過又能忍人所不能忍事母至孝年逾六旬猶然出告反面不失孩提真性設帳授徒以實行爲先文藝次之子敦復歲貢生士彥行己待人悉本忠厚事父柔聲愉色務得其歡心親稍拂意輒長跪引罪與羣弟相友愛同治初回亂集捐團練爲城防計勞瘁不辭充文社長遇事一秉公正素習堪輿岐黃晚又講黃庭修養法年七十卒

甘肅新通志

卷六十七

人物志 羣材二

空

沈一清字夷若禮縣人同治癸酉拔貢光緒己卯舉人任文縣訓導爲人豁達不羈嬰疾積年賫志以沒邑人惜之

郭徵庸徽縣人少聰敏多材崇禎初以例貢官山西屯留縣主簿闖賊之亂謝病家居 國朝定鼎肅王知其能辟爲中外府掌記軍需羽檄咸出其手隨大軍入蜀以功擢升知縣開路運餉勞績稱最歷升敘州府知府時山賊剽掠戶口流散徵庸隨宜撫綏民乃相安師行供億悉具踰年卒於官又邑人從肅邸征蜀者有副貢馬一鴻廩生馬一鶚鴻累功擢知蓬州鶚以功知武隆縣有遺愛致政養親行著於鄉

馬一鵬字天衢徽縣人有奇才宏識崇禎間貢成均授山東禹城縣主簿順治二年安民有功擢本縣知縣復補授鄒平縣所至有聲以親老致仕



高脫凡字清虛徽縣人順治初歲貢任涇陽訓導陞鄠縣教諭康熙初以治行薦授江西樂平縣知縣綽有賢聲

郭 度徽縣人師游子順治戊子 恩貢庚寅 廷試考授州同知初銓同知以治行考績奏臺檄權知曹州知州事

山晉濤徽縣人康熙初有名庠序博通經術尤工時藝教學於鄉三十年每臨講坐必執經令學者問難然後敷陳持行守正或以非道相干面斥之無少假人稱爲栗亭先生

陳所抱徽縣人康熙末由附生捐授訓導未銓復以軍功議敘知縣乾隆九年分發湖南任湘陰縣歷署繁劇不任胥吏不用刑錢於敦行孝弟者尊禮之獷俗漸馴子二長斌國學生考職主簿以東賑例議敘縣丞銓授陝西郃陽縣丞詳諳吏治大軍征額魯特隨營有功陞知縣歷署岐山寶雞等縣事有善政次恪江西上饒

### 甘肅新通志

### 卷六十七

人物志 羣材二

三

縣縣丞

張 綬字佩青徽縣人幼有文才屬思警敏年十四補博士弟子員旋食廩餼乾隆庚子舉於鄉辛丑聯捷成進士選翰林院庶吉士散館授職檢討充四庫全書分校嘉慶丁巳擢右春坊右贊善以賦姜暮鐵笛詩稱 旨翌日 命在上書房行走綬既入直徵經考史摯意虛心寒暑無間輟親王大臣皆奏其勤且慎充日講

起居注官

國史館纂修文淵閣校理累遷至侍讀學士咸安

宮總裁綬邀

兩朝知遇之恩前後恭和 御製詩茶宴聯句並

奉 命題詠應

制之作咸蒙 嘉獎 恩賞福字書畫扇柄香

珠荷包葛紗綢緞筆墨紙卷不可勝紀又有玉杯如意之 錫旋

奉 命視學廣西

陛辭日 上曰朕素知汝行當大用汝去好

爲之下車之日即除革贄見陋規臨郡校士關防嚴肅士習端文



風正巡撫某密奏綬視學稱職尋以染患瘴癘卒於任年五十四  
綬爲人淡默自安不尙奔競居詞垣二十載奉職之暇輒手一編  
諷誦超擢清要漸幾卿貳當入直時成邸知其賢雅重之每有吟  
詠必令應和贈詒晉齋詩草八卷秦州雜吟篆隸一函手卷一軸  
皆希世之寶也綬著書見藝文目錄

趙遇泰字階平高筠字禮堂皆徽縣貢生遇泰持身嚴正待人則  
渾厚不苛家居教授邑儁士半出其門同治軍興邑令延襄防務  
勤勞冠一時薦保藍翎六品銜筠敦行與遇泰侔而取予不苟交  
遊尤謹學博教勤門下入庠者四十餘人二子亦皆名諸生同治  
中爲西南城團首先後邑令時就筠諮決方略論功保舉訓導未  
選缺卒先是道光中有貢生山毅者字致遠學問宏博行誼亦卓  
所爲制義力追先正竟終身不遇士論惜之

甘肅新通志

卷六十七

人物志 羣材二

齒

張碩弼胡向華皆兩當歲貢生碩弼爲陝西布政司理問勤幹有  
爲司務賴以取辦向華初官佐貳治行上聞薦升常德府知府郡  
人稱之又有侯昌祚張恂如者皆任教職有賢聲昌祚自隆平訓  
導累升咸陽教諭岷州教授改江西甯都縣丞恂如自延安訓導  
擢河州學正

羅暉兩當舉人張溥韓階張炯皆兩當貢生也四人積學好古治  
詩古文有義法縣有建置興作暉階炯常爲之記誌其題詠古蹟  
勝景及與名流唱酬則暉溥之作傳播爲多而炯次之與階同治  
古文者又有趙英韓塘然雅正不如階也英塘亦皆歲貢

羅新蔚郭重義龍澍霖張煥奎王尙庠皆兩當歲貢生新蔚品端  
學粹授徒以器識爲先澹泊寡營足不履城市事繼母待昆弟以  
孝友稱爲學校矜式重義樂施爲蒲城訓導善誘不倦澍霖有學



行任皋蘭訓導復選平羅未赴任煥奎字稻園未冠入庠肄業關  
中受業路德門下後任安化訓導從學者眾尚庠亦善誘不倦門  
下入庠者十數人子姪孫亦皆入庠貢成均壽七十無疾而終  
荆維壙字勤垣兩當歲貢生弱冠入庠爲文才氣奔放鄉試屢薦  
未售遂絕意進取肆力於經史百家治詩古文詞有法主講香泉  
書院凡二十年以維持風化爲任邑宰贈詩有偃有澹臺我有君  
之句完租稅先里黨以爲倡監督大工役不辭勞怨雜著皆散佚  
惟周餘錄尙存子鴻題廩生

韓塘字鑑湖兩當人有善行主廣香書院講席多士欽服邑令  
德俊重修縣志資採訪藝文多出其手好學不倦老而彌篤

李廷選兩當人咸豐二年隨征襄陽膺六品軍功精敏強幹有將  
才七年五月征商州更著勞績



